

1 CORINTIOS

Pablo queédih ã túyat túutat

¹⁻² Weém, Pablo, biíhdih daacát túutnit, yeéb Corinto tútchidih moón Jesúíhwādh wā wahna caá. Dios weemdhí ñionit, Jesucristoíh túini doonádh ã naáwát túutni wā jumna caá. Pánihni jumna, yeebdíh búdí wā túyat túutna caá. Wā úud panihni Sóstenesbut yeebdíh jenah joinít, búdí ã túyat túutna caá. Yeéb jwí Maáh Jesucristodih jepahnit, Dioíhwā ñi jumna caá. Nihat baácdih moonbút bíc yoobó jwí maáhdih úúbhñit, bícdih jumnit pah Dioíhwā jwí jumna caá. Jwiít nihatdh Jesús jwí Maáh ã jumna caá.*

³ Dios jwí íip, jwí Maáh Jesucristobut yeebdíh búdí oinit, í teo wáaca naáh, bícdih ñi túi jummat pínah niijná.

Dios ded pah queédih ã túi teo wáacat

⁴ Diosdh úúbhna, “Paá, queét Jesúíhwādh búdí oinit, ma túi teo wáacatdh túina caá”, wāpí niijná caá. ⁵ Pánih teo wáacna, ã jéihyanachah, ñi túi jéih naóh yapana caá. ⁶ Páant ã túi teo wáacachah, wā naóhñiji Jesúíh doonádh ñi túi joyóp jī. ⁷ Búdí ã teo wáacachah, yeebdíh dedé jéihcat pínah ã wihcan caá. Pánihna, Jesús ã jwúub dei jūúwát pínahdh wēi páinit, ã wēpatjīh ñi míc túi teo wáacna caá. ⁸ Yeebdíh páantjeh ã túi teo wáacbipna caá, caandíh ñi cádahcat pínah niijná. Páant ñi cádahcah, Jesucristo ã jwúub dei jūúwúchah, yeebdíh yéejat peéh chájat ã wihcan níit. ⁹ Dios jwiít dh ã ñíwip jī, jwí Maáh Jesucristodih jwí túi pej jummat pínah niijná. Páant ã niijátji bíc yoobó ã chájipna caá.

*
1:1-2 Hch 18.1

Ī míc jūihñatdih ã cádahat tútat

¹⁰⁻¹¹ Dios páant yeebdíh ã teo wáacachah yuhna, Cloéwā wā pebhna jūinít, ñi míc jūihñat doonádih weemdíh ĩ naáwáp jī. Páant ñi chājachah, wā úudwā panihnitá, jwī Maáh Jesucristo ã wēpatjīh nin pah yeebdíh wā wətna caá: ¡Ñi míc jūihñatdih caanjíhjuh ñi cádaaha! ¡Páant bóojeh! Yeebdíh túi bícdih jummat caá náahap. Jesús ded pah ã jummatdih, ded pah ã bohéatdihbut bícdih ñi túi jenah joyoó. ¹² Páant niijnít, nin pah wā naóhna caá. Yeeb bícdih ñi túi jumcan caá. Biquína, “Jwiít Pabloíhwā caá. Caán chah túi bohéni caá”, ñi niijná caá. Bitá, “Jwiít Apoloíhwā jwī jumna caá. Caánboó chah túi naóhni caá”, ñi niijná caá. Bitá, “Jwiít Pedroíhwā caá. Caánboó chah túi jéihni caá”, ñi niijná caá. Bitá “Jwiítjuh Cristo ã bohéatdih yoobópdih jéihnit caá. Pánih jumna, jwiítjuh áihwā caá”, ñi niijná yuh caá.* ¹³ Obohjeéhtih, Jesucristo páant ñi jummat pínahdih át bohécap jī. Weém, Pablo, yeebdíh wən wəhni nihcan caá. Wā wēpatjīh nihcan jí yeebdíh ĩ daabánap jī. Jesús ã wēpatjīh ĩ daabánap jí, áihwā ñi jummat jútat pínah niijná. ¹⁴⁻¹⁵ Crispo wūt jumni,* Gayo wūt jumni,* queét chénewādihjuh wā daabánap jī. Bitadih wā daabácap jī. Yeebdíh wā daabánachah nihna, “Pabloboó ã wēpatjīh weemdíh ã daabánap jí”, ñita nij tágaá. Pánihna, “Queétdih wā daabátjidih túina caá”, Diosdih wā niijná caá. ¹⁶ ¡Cáaj! Estéfanawādih wā quíib bəudúp be. Queétdihbut wā daabánap jī. Obohjeéhtih, “Bitadih wā daabácap jí”, wā níj jenah joiná caá.* ¹⁷ Cáacwādih daabáni pínah Jesús weemdíh wahcan, áih túini doonádih naáwát túutna, ã wahap jī. Jwiít cáacwā jwī jenah joyátjīhjuh ã naáwát túutcap jī. Páant

* 1:12 Hch 18.24 * 1:14-15 Hch 18.8 * 1:14-15 Hch 19.29; Ro 16.23

* 1:16 1Co 16.15

wã naáwáchah nihna, joinítboó “Caán túi naóhni caá”, ni-ijnít, weemdíhjuh ita wēi jenah joi tága. Jesúsdiuh ita jenah joicán taga. Obohjeéhtih, Dios ã wēpatjīh yoobópdih áih doonádih weemdíh ã naáwát tūtup jī, Jesús cruzboó ã wun wūhatjidih ī túi jenah joyát pínah niijná.

Cristo Dios ã jéihyat, ã wēpatdih júutni caá

¹⁸ Jwiít Jesús cruzboó ã wun wūhatji doonádih joinít, caandíh jwī jepahachah, Dios ã wēpatjīh jwiít dih ã túi ubna caá. Obohjeéhtih, Jesúsdiuh jepahcannit iiguípna bejnit pínah, cruzboó Jesús ã wun wūhatji doonádih joinít, nin pah ī niīj jenah joiná yuh caá: “Dedé pínah nihcan jīí. Páantjeh át wunjehep wut jī”, ī niīj jenah joiná caá.*

¹⁹ Páant ī niiját biíc yoobó Dios naáwát dih naóh yapani nin pah át niīj daacáp tajī:

“Dios nin pah ã niijná caá: ‘Cáacwã ī bohéatdihjuh túi jéihna yuhna, weemdíh ī jenah joicát jīb ī buudbípna caá’, ã niijná caá”, át niīj daacáp tajī. (Is 29.14)

²⁰ Diosdiuh jéihcannit ī jenah joyátjīhjuh búdí ī jéihyechah yuhna, Dios ī jéihyatdih “Dedé pínah nihcan caá”, ã niīj jenah joiná caá. Pánihna, jwiít cáacwã jwī jenah joyát dihjuh bohénit, ī túi jéihna yuhna, jeáboó ī bejcan niít. Moisés ã wutatjidih bohénit, túi naóh nitbut jéihna yuhna, Dios pebhna ī bejcan niít.* ²¹ Dios nihatdih jéihni jumna, nin pah át niīj jenah joyóp wut jī: “Cáacwã ī jenah joyát dihjuh jéihnit dih wã túi ubcan niít. Obohjeéhtih, wã wūh ã wun wūhatdih jenah joinít dihjuh wã túi ubbípna caá”, át niijíp wut jī. Jesúsdiuh doonádih jwī bohénachah, jepahcannitboó “Oboh ī naáwátjeh caá”, niīj jenah joinít, buudníť ī jum bípna caá.

* 1:18 Ro 1.16 * 1:20 Job 12.17; Is 19.12; 33.18; 44.25

²² Jwiít judíowã nin pah jwĩpí niíj jenah joiná yuh caá: “Dios ã wēpatdih ã júutcah, caandíh jwĩ jepahcan niít”, jwĩ niijná caá. Yeéb judíowã nihcannit nin pah ñipí niíj jenah joiná yuh caá: “Dios ded pah ã jummatdih jwĩ jenah joyátjñhbeh beh joicán, caandíh jwĩ jepahcan niít”, ñi niijná caá. ²³ Obohjeéhtih, jwiítboó nin pah jwĩpí niíj naóh bohéna caá: “Jesucristo cruzboó jwiítidih át wun wũhup tají”, jwĩ niijná caá. Páant jwĩ niíj bohéatdih joinít, jepahcannit judíowã nin pah ã niíj jenah joiná yuh caá: “Obohjeéhtih, Dios ã wahni jwiítidih túi ubni pínah wuncanjeh, jwĩ maáh ã jumbipna caá. Pánihna, Jesús wunah bejna, caánboó jwĩ páini nihcan caá”, ã niíj jenah joiná caá. Páant niíj jenah joinít, Jesúsíh doonádih ã yap yohna caá. Judíowã nihcannitboó nin pah ã niíj jenah joiná yuh caá: “Í yee naáwátjeh caá”, niíj jenah joinít, queébtut Jesúsíh doonádih ã yap yohna caá. ²⁴ Obohjeéhtih, biquína jwiít judíowãdih, yeéb judíowã nihcannitdihbut Dios ã ñíwíhah, Jesúsíh doonádih túi joí jepahnit, nin pah jwĩ niíj jéihna caá: “Dios chah wēpni, níhat jéihni jumna, cáacwãdih túi ubat túut niijná, Jesúsíh át wun wũhat túutut tají”, jwĩ niijná caá. ²⁵ Páant ã ñíwíhah, áihwã jumna, nin pah jwĩ niíj jéihna caá: “Jwiít cáacwã jwĩ jenah joyát chah Dios át jenah joi tága. Jwiít cáacwã jwĩ wēpat chah Dios ã wēpna caá”, jwĩ niijná caá.

²⁶ Páant wã naáwátidih jenah joinít, Dios yeebdíh ã ñíwíhah, ded pah ñi jummatdihbut ñi túi jenah joyoó. Wã úudwã panihnitá, bita yeebdíh ennit, “Queét bohécannit, dinero wihcannit jumna, oboh jumnit caá”, ã niíj jenah joyóp tají. ²⁷ Obohjeéhtih, “Jéihcannitjeh caá”, cáacwã ã niijnítidih Dios át ñíwip taga. Pánih ñíona, jéihnitboodíh “Búdí bohéna yuhna, wã jéihyat dedé pínah nihcan caá”, Dios queétdih át niíj jéihyanap taga. Oboh jumnitdihbut

ã níwichah ennit, “Wã wēpat dedé pínah nihcan caá”, maátadih át niíj jéihyanap taga. ²⁸ Oboh jumnit, bita ĩ deohnit, bita ĩ enah bojnitdíhbut Dios át níwip taga. Pánih níonit, “Jwiít cáacwã jwĩ jéihyat weemdíh ã jumuchah yuhna, dedé pínah nihcan caá”, jwiít dih át niíj jéihyanap taga. ²⁹ Pánihna, Dios pebhboó juibínit, “Wã jéihyatjĩhjuh wã jũúwúp be”, jwĩ niíj jéihcan niít. ³⁰ Obohjeéhtih, Dios caá jwiít dih át teo wáacap taga, Jesucristodih jepahnit, áihwã jwĩ jumap pínah niijná. Pánih áihwã jumna, Jesús ã jenah joyát pahjuh muntih Dios jwiít dihbut ã jenah joyát túutna caá. Æ wun wũhatdih jwĩ túi jenah joyóchah, jwiít áihwãdih “Caánboó túini caá. Wã peéh chãjcan niít”, Dios ã niíj enna caá. ³¹ Nin pah Dios naáwát dih naóh yapani át niíj daacáp tajĩ: “ ‘Weemdíh dedé judhdad wihcan caá’, niijnít ĩ jumca bojo naáh. Obohjeéhtih ‘Jwĩ Maáh Dios nihat jéihni, weemdíh ã túi teo wáacap be’, niijnít ĩ jumca naáh”, át niíj daacáp tajĩ. *

2

Cristo ã wun wũhatji

¹⁻² Wã úudwã panihnitá, ñi pebhna jwĩh juibína, ded pah wã jumapjidih ñi túi náhninaá. Ñi pebhboó wã bejat pínah jãtĩh nin pah wã niíj jenah joyóp jĩ: “Jesucristo ded pah ã jumapjidih bohéna, jwiít dih ã wun wũhatjidih queétdih wã jéihyabipna caá”, wã niíj jenah joyóp jĩ. Páant niíj jenah joinít, Dios weemdíh ã jéihyani doonádih túinijeh yeebdíh wã naóh bohénap jĩ, “Pablo nihat jéihni caá”, ñi niíj jenah joicát pínah niijná. ³ Ñijeéh jumna, nin pah wã niíj jenah joyóp jĩ: “¿Yoobóp dih niít wã bohénap? ¿Jesúsdih ĩ túi jepahmi naniít? ¿Jepahcan, ijnit, weemdíh ĩ yoh bacami naniít?” niíj jenah joinít,

* [1:31 Jer 9.23-24](#)

búdí wā úmup jĩ.* ⁴ Jwiít cáacwā jwĩ jenah joyátjĩhjih wā naóh bohécap jĩ. Obohjeéhtih, Túini Espíritu ā wēpatjĩh yeebdĩh túinijeh wā bohénachah joinít, Dios ded pah ā wēpatdih ā júutuchah ennit, Jesúsdi h ñi jepahap jĩ. ⁵ Pánihna, “Pablo ā túi jéihyatjĩhjih jwiít dih ā jepahat túutcap jĩ. Obohjeéhtih, Dios ā wēpatjĩh ā chāj júutuchah ennit, Jesúsdi h jwĩ túi jenah joyóp jĩ”, ñi niiját pínah niijná, páant wā bohénap jĩ.

Túini Espíritu ded pah Dios ā jummatdih ā jéihyaat

⁶⁻⁷ Diosdi h jéihcannit ĩ jenah joyát dedé pínah nihcah, Diosboodíh túi jenah joyát caá náahap. Diosdi h túi jenah joinít dih nin pah wāpĩ níj naóh bohéna caá: “Dios ni hat jéihni jumna, jwiít dih túi ubat túut niijná, Jesúsdi h át wahjip taga. Pánih chājna, jeáboó jwĩ juibínachah, chah túinidihbut jwiít dih ā chāj bipna caá”, wāpĩ níj naóh bohéna caá. Nin baác di h moón maáta ĩ jenah joyát chah Dios ā jenah joyát caá. Queétboó ĩ wunuchah, ĩ jenah joyátjidi h bita ĩ náhnican níft. Obohjeéhtih, Diosboó nin baác di h ā chājat pínah játih, Jesúsdi h ā wah deyaat pínah di h átát jenah joijíp taga. Jon játih páant níj jenah joiná yuhna, jwiít cáacwā di h át jéihya jwuhcap taga. ⁸ Páant ā jenah joyátjidi h nin baác di h moón ĩ maátaboó ĩt beh joicáp jĩ. ĩ beh joiná nihna, ni hat jéihni, chah wēpni, jwĩ Maáh Jesucristodi h ĩta mao yohcan taga. ⁹ Dios páant ā níj jenah joyátjidi h cáacwā ĩ beh joicáh yuhna, ā naáwát di h naóh yapani nin pah át níj daacáp tajĩ:

“Caandíh oinit di h ded pah Dios túini ā chājat pínah di h jwiít cáacwāboó encan, joicán, jwĩ jenah joi jwúhcan caá. Ded pah jwĩ jenah joyát chah ā túi jum b ipna caá”, át níj daacáp tajĩ. (Is 64.4)

* 2:3 Hch 18.9

¹⁰ Páant ã jéihya jwuhcah yuhna, ã jenah joyátjidih buu jwuhna Túini Espírituboó jwiítidih ã jéihyana caá. Caán Túini Espiritu nihat jéihni, Dios ã jenah joyátidih ã túi jéih beedána caá.

¹¹ Jwiít cáacwã biíh ã jenah joyátidih jwí jéihcan caá. Caanjéh caá ã jéihyep. Pánihat pah, jwiít cáacwã Dios ã jenah joyátidih jwí jéihcan caá. Áih Túini Espiritujeh caá caandíh ã jéihyep. ¹² Diosdih jéihcannit ï jenah joyát pah jenah joiná, Dios ã jenah joyátidih jwí beh joicán caá. Páant jwí beh joicáh, áih Túini Espiritudih jwiítidih Dios ã wũhup jĩ, ded pah oinit, ã túi chãjatjidih jwí jéihyat pínah niijná. ¹³ Páant ã jéihyanachah, ã wēpatjĩh jwiítbut yeedíh jwí jwũub bohéna caá. Diosdih jéihcannit ï jenah joyát pah jenah joinít, jwí bohécan caá. Obohjeéhtih, Túini Espiritu ã jéihyanachah, bitadih jwĩpí bohéna caá.

¹⁴ Jesúsdi h jepahcannit, Túini Espiritu wihcannit, caán ã bohéatidih náahcan, “Dedé pínah ni hcan caá”, ï niij jenah joiná yuh caá. Páni hna, Túini Espiritu ã teo wáacchah, ã bohéatidih queét ï jéih beh joicán caá. ¹⁵ Túini Espiritu ã teo wáacachah, Dios ded pah ã bohéatidih jwiít Jesúihwã jwí jéih beh joiná caá. Páni h beh joiná, ã weñat pínahdih jwí jéih chãjna caá. Obohjeéhtih, Jesúsdi h jéihcannitboó páant jwí chãjachah ennit, Dios ã weñat pínahdih beh joicán, “¿Dépanih tigaá queétboó páant ï chãj?” ï niijná caá. ¹⁶ Páant ã jummat pah jon játih Dios naáwátidih naóh yapani Isaías nin pah át niij daacáp tajĩ:

“Dios ni hat jéihni ã jumuchah, jwiít cáacwãboó ded pah ã jenah joyátidih jwí jéih beedácan caá. Páni h jéihcannit jumna, caánboodíh jwí jéih bohécan caá”, át niij daacáp tajĩ.*

* 2:16 Is 40.13; Ro 11.34

Obohjeéhtih Túini Espíritu ã teo wáacachah, jwiítboó Jesucristo ded pah ã jenah joyát dih jéihna, ã weñat pínahdih jwí jéih chājna caá.

3

Pablo, Apolosjñh Diosdih oboh teo wāhñitjeh ĩ jumat

¹ Yeéb wā úudwā panihnitá, Jesucristodih jepahna yuhna, páantjeh jáap jéihnit pah ñi jumna caá. ² Yeebdíh maatápdih wā bohénachah yuhna, wébit páantjeh nom jwuhnit dée pah ñi jumna caá. Páant ñi jumuchah, ñi túi beh joyát pínah niijná, buocannidihjeh yeebdíh wā naóhna caá. Pánihna, nom jwuhnitdih jeémát dih jwí wūhcat pah, buoni bohéát dih yeebdíh wā jéih naóh jwuhcan caá. ¿Dépanihna, páant ñi jum? ³ ¿Dépanihna Túini Espíritu wihcannit pah Dios ã weñat pínahdih ñi chājcan? Túini Espíritu wihcannit pah jumna, tūbit míic jūihnit, míic íjanitbut ñi jumna caá. Jesucristodih jepahcannit biíc yoobó ñi chājna caá. ⁴ Yeéb biquína “Weém Pabloíh caá”, niijnít, bita “Weém Apoloíh caá”, niijnít, tūbit ñi míic íjana caá. Pánih míic íjana, Diosdih jéihcannit dée pah ñi jumna caá.*

⁵ Biquína “Pablo caá chah jéihni”, niíj jenah joí, bitabut “Apolos caá chah jéihni”, ñi niíj jenah joiná caá. Páant ñi niíj jenah joicá bojoó. Jwiít bohénit nihát biíc yoobó Diosdih teo wāhñitjeh jwí jumna caá. Ded pah ã wutuchah, caandíh jepahnitjeh, yeebdíh jwí bohénap jī. Páant ã wutuchah, jwí bohénachah joinít, Jesucristodihjeh yeéb ñi jepahap jī. ⁶ Nin pah ã jumna caá: Pácahidih momni dée, weém jī yeebdíh Jesúsíh doonádih wā jwíh naáwáp jī.* Páant ã momat túttimah, pácahi en daoní dée, Apolos

* 3:2 He 5.12-13 * 3:4 1Co 1.12 * 3:6 Hch 18.4-11

yeebdíh ã jwúub bohénap be, chah ñi jéihyat pínah ni-ijná.* Obohjeéhtih, momnidih Diosjeh chíihanit, ã behana caá. Pánihat pah Diosjeh túut nuumát túutnit, yeebdíh ã jéihyana caá. ⁷ Momni, en daoníbut oboh jumnitjeh caá. Diosjeh ã chíihana caá. Pánihna, weém wã túi naáwáchah yuhna, Apolosbut ã túi bohénachah yuhna, Dios yeebdíh ã jéihyacah, ñita beh joicán tagaá. Páant ñi beh joicán, caandíh ñita jepahcan tagaá. ⁸ Pácavidih momni, en daoníbut, Dios ã enechah, biíc yoobó i jumna caá. Dios ã wēpatjīh biíc ã túi bohéatdih ennit, ã pehbóó ã juibínachah, Dios chah ã jīb chājīpna caá. Obohjeéhtih biíhboó ã túi bohécátidih ennit, ñump ã jīb chājīpna caá. ⁹ Jwiít nihat Dios ã wutatdih jepahnit, yeebdíh jwī bohéna caá. Yeéboó Dioíh pácahi dée, áih muú dée ñi jumna caá. ¹⁰ Dios weemdíh ã túi teo wáacachah, weémboó yeebdíh wã jwīh bohénap jī. Muú chājna, túini jīhlo jwio náhdih ñíonit, i dodhdát dée, weémboó yeebdíh wã jwīh túi bohénap jī. Túttimah, muú chājnit dée bita yeebdíh it jwúub bohénap taga. Túini muú chājnit dée, jwiít bohénitboodíh Dios ã wēpatjīhjih túi bohéat caá náahap. ¹¹ Túini jagáp nahdih i dodhdát dée, Jesucristo ã wun wēhatjidih wã jwīh bohénachah, ñi jepahap jī. ¹² Maatápdih jumni pínah muúdíh chājīhna, túini máa nahnadih ñíonit, túi chājat caá náahap. Pánihat pah, yeé Dioíh muú dée ñi jumuchah, ñi jepah cádahcat pínah niijná, wã túttimah jūóhnitdih Túini Espíritu ã wēpatjīh yoobópdih bohéat caá náahap. ¹³⁻¹⁴ Pánih chājna, Jesús jwúub dei jūóhna, muúdíh i túi chājat dée, i túi bohéatji jīb, Dios ã túi chājīpna caá. ¹⁵ Obohjeéhtih, muúdíh i túi chājcat dée, i túi bohécátji jīb, ã túi chājcan níft. Queét túi bohécannitboó Dios pebhna i juibínachah yuhna, Túini Espíritu ã teo wáacatjīh i bohécach, Dios queétdih ã túi

* 3:6 Hch 18.24-28

chãjcan niít. ¹⁶ Pánihna, “Jwiít biícđih Dioíh muá dée jwĩ jumuchah, Túini Espíritu jwĩjeéh ã jumna caá”, ñi niíj túi jenah joyoó.* ¹⁷ Pánih jumna, áihwãjeh jwĩ jumuchah, ded yeéb biícđih ñi jumatđih ã yéejanachah, Dios caandíh búdí ã peéh chãjbipna caá.

¹⁸ Biquína nin pah ñi niíj jenah joiná caá: “Weém túi jéih beedáni caá. Dedé weemđíh jadhcan caá”, ñi niíj jenah joiná yuh caá. Obohjeéhtih, páant niíj jenah joinít, yeebjéh ñi míic yeena caá. Páant ñi niíj jenah joyáđđih yeebđíh cádahat caá náahap. Pánih cádahnit, túut nuumná, nin pah ñi jwúb niíj jenah joyoó: “Weém bainí jéihnijeh jumna, yoobópdih jéihyat túut niijná, Dios ã teo wáacatđih búdí wã náahna caá”, ñi niíj jenah joyoó. ¹⁹ Diosboó caandíh jepahcannit ded pah í jenah joyáđđih ennit, “Dedé pínah nihcan caá”, ã niijná caá. Páant niijná, nin pah jon jãtíh át niíj daacát túutup tají: “ Jwiít chah jéihnít caá’, niíj jenah joinítđih wã yohbipna caá”, át niíj daacát túutup tají.* ²⁰ Davidjiboodíh biíc yoobó nin pah át niíj daacát túutup tají: “Weemđíh jéihcannit í jenah joyáđđih ennit, ‘Dedé pínah nihcan caá’, át niíj daacát túutup tají.* ²¹⁻²² Biquína yeéb nin pah ñi niíj jenah joiná yuh caá: “Pablo chah jéihni ã jumuchah, weém áih jumna, weembút chah jéihni wã jumna caá”, ñi niíj jenah joiná caá. Bitabut Apolosdih, Pedrodihbut biíc yoobó ñi niíj jenah joiná yuh caá. Obohjeéhtih, páant ñi niíj jenah joyát yoobópdih nihcah, túut nuumát caá náahap. Yeéb jwíhwã nihcah, jwiít yeebđíh bohénitboó ñíhwã jwĩ jumna caá. Dios jwiítđih yeéb nihátđih át wũhup taga. Páant yeebđíh ã wũhuchah, jwiít nihát yeebđíh teo wáacnit jwĩ jumna caá. Yeebđíh teo wáacnitđih wũhnit,

* 3:16 1Co 6.19; 2Co 6.16 * 3:19 Job 5.13 * 3:20 Sal 94.11

nin baácboó ñi jum jwuhchah, páantjeh ã túi chãj bipna caá. Wunnit, ã pehbboó ñi juibínachah, chah túini ã wũh bipna caá. Bũ lãa Dios yeebdíh túi teo wáacna, túttimah bóo láabut, chah ã teo wáac bipna caá. Pánihna, nihat túini ã wũhni ñíih ã jumna caá. ²³ Yeéb Cristoíhwã jumna, caánboó Dioíh ã jumchah, yeebbút Dioíhwã ñi jumna caá.

4

Cristo ã naáwát túutnit ded pah í jumat

¹ Jwiít yeebdíh bohénitdih “Queét Jesucristodih teo wũh nitjeh caá. Dios cáacwãdih ã jéihya jwuhca naáhdih Pablowãdih át bohé jibat túutap taga”, niíj jenah joyát caá náahap. ² Det teo wũh nitdih í maátadih jeh túi jepahat caá náahap. Pánihat pah, jwiít Jesús dih teo wũh nit jumna, jwí Maáh ded pah ã bohéat túutuchah, jwiít dih yoobópdih bohéat caá náahap. ³ “Caán Pablo túi yoobópdih ã bohécã caá”, yeéb ñi niijíchah yuhna, weémboó wã jíghãcan caá. Bitabut biíc yoobó í niijíchah yuhna, biíc yoobó wã jíghãcan niít. Weemjéhbút “Dios ã bohéat túutatjidih wã túi bohécã beé”, wã niíj jenah joicã caá. ⁴ “Dios dih jepahnit, yoobópdih wã bohécã caá”, niíj jenah joicã yuhna, “Weém túi yoobópdih jeh bohéni caá. Dedé yéejat jíib weemdíh ã wihcã caá”, wã jéih niijcã caá. Jwí Maáh Jesucristojeh weemdíh ennit, “Meém ma túi bohénãp be”, niijni pínã caá.* ⁵ Jwí Maáh Jesús ã jwúub dei jũúwát pínã játih, yeébboó ded pah jwí bohéat, bita í chãjatdihbút ennit, “Caánboó jwí Maáh ã wutatdih ã túi chãjãcan caá”, niijcát caá náahap. Obohjeéhtih, jwúub dei jũóh nit, Jesúsboó ded pah jwí bohéatjidih jwiít dih ã naóh bipna caá. Jwiít cáacwãboó ded pah biíh ã chãjatdih,

* 4:4 1Jn 3.19-21

ã jenah joyát dihbut jwĩ jéihcan caá. Jwiítjehbut jwĩ jenah joyát dih jwĩ jéih beedácan caá. Diosjeh caá ã jéihyep. Páni hna, Jesús jwúub jũóh nit, ni hat jwĩ chãjatjidih, ni hat jwĩ jenah joyátjidihbut ã naóh bipna caá. Caán láajeh caá “Meém ma túi chãjap jĩ”, jwiít dih ã ni ij naóh bipna caá.

⁶ Wã úudwã panihnitá, páni h naóhna, ñi túi beh joyát pínah niijná, ded pah jwiít Apolosjĩh jwĩ jummatdihjeh wã naáwáp be. Ded pah jwĩ jummatdih ennit, bíc yoobó yeebút ñi jéih jum bipna caá. Dios ã daacát túut dih jepahna, “Yeebdíh bohéni ã jéihyat chah jwiít dih bohéni ã jéihna caá. Páni hna, meém ma jéihyat chah caá wã jéihyep”, ñi míc niijcá bojóo ⁷ “Caán bohéniboó chah jéihni ã jumuchah, caandíh caá jwĩ náahap”, ñi niijcá bojóo. Ni hat ñi bíbohatdih Dios yeebdíh wũhni jeh caá. Jwĩ bohéatdih ñi joyóchah, Dios caá yeebdíh át beh joyánap taga. Ñi jenah joyátjĩh jeh ñi beh joicáp be. Páni hna, ñi jéihyatjĩh jeh beh joinít dée, yeebdíh nin pah niijcát caá náahap: “Weemdíh bohéni túi jéihni ã jumuchah, weembút túi jéihni jumna, Jesúh donádih weemjéh wã túi beh joyóp be”, niijcát caá náahap.

⁸ Yeéb nin pah ñi ni ij jenah joiná caá. “Jwiítboó Dioh donádih túi jéih beedánit caá. Jwiít dih dedé judhdat wihcan caá. Túini Espíritu ni hat ã wũhni wēpat jwiít dih ã jumna caá. Pablowã ñi wihcah yuhna, jwiítjeh maáta jwĩ jumna caá”, ñi ni ij jenah joiná yuh caá. Obohjeéhtih, jwĩ Maáh Jesús ã jwúub dei jũúwúchah, caán bícdih maáta yoobóp dih ñi jumuchah, áta túi taga. Páni h jumna ni hna, jwiítbut ñijeéh maáta jwĩta jum taga. Ni hat yeejép yapat áta péa taga. Obohjeéhtih, páant ã yap jwuhcan caá. ⁹ Weémboó nin pah wã ni ij jenah joiná caá: “Jwiít Dios ã naáwát túut nitdih oboh jumnit, peéh mawat pínahdih páinit pah bitaboó ñi enna caá. Ni hat cáacwã, ni hat Dioh ángelwãbut ded pah jwiít dih ã yapat pínahdih jéihyat túut

niijná, jwiít dih enna caá ã chãjap”, wã niíj jenah joiná caá. ¹⁰Páni h ennit, “Jesucristo í h dooná dih naó hna, queét dedé pínah nihcan caá”, jwiít dih ã niíj enna caá. Obohjeéhtih, “Queét Jesú í hwã jumna, dedé jéihcat pínah wihcan caá”, yeébbodí h ã niíj enna caá. “Queét wêp naó hnit nihcah, queétdih jwí jepahcan niít”, jwiít dih ã niíj jenah joiná caá. Obohjeéhtih, “Queét ã túi wêp naáwáchah joinít, nihat cáacwã ã túut nuumbípna caá”, yeébbodí h ã niíj jenah joiná caá. Páni hna, dawá yeebdí h wêi naó hnit, jwiít-bodí h ã iiná caá. ¹¹Jwiít jwí bohé jibichah, nuugúp tubna, ãpí taca joót na caá. Jwiít dih túini yégueh wihcan, muubút wihcan caá. Jwí naáwáchah joinít, íjina, jwiít dih dawá láa bita ã mawap be. Jwí jib bohé jwíhipmant, buubút biíc yoobó ã yapna caá. ¹²Jwí náahat dih jíib chãjat túut niijná, búdí teonit, jwí pí chuuná caá.* Cáacwã jwiít dih yeejép ã naáwáchah joinít, yeejép naó h jwúubacanjeh, Dios queétdih ã teo wáacat pínah dih jwí pí úúbhna caá. Yeejép ã chãjachah yuhna, jwí pí enah bojna caá. ¹³Yeejép dooná ã naáwáchah joinít, “¿Biíc dih jwí jéih jumcan niít?” jwí pí niíj jwúubana caá. Nihat cáacwã ã yohni pah jwiít dih í pí enna caá. Jwí bohé jwíhipmant buubút biíc yoobó jwiít dih ã jenah joiná caá.

¹⁴Caandí h daácna, ñi tíicat pínah nihcan, yeéb wã weh panihnit dih oina, ñi túut nuumát pínah dih náah yacnit, páant wã niíj daacáp be. ¹⁵Nin wã naáwát pínah dih ñi jenah joyoó: Weém ñi íp panihni caá. Yeebdí h wã bohéat túttimah, dawá Jesú í h dooná dih bohénit ã jumuchah yuhna, weemjéh beé yeebdí h jwí h naó hni. Páant wã jwí h naáwáchah joinít, Jesucristo dih ñi jepahap jí. ¹⁶Ñi íp panihni jeh yeebdí h oinit, páant wã niíj naáwáp be. Í mána ded pah ã jumat dih ennit, wébitbut biíc yoobó í pí chãjna

* 4:12 Hch 18.3

caá. Pánihna, ñi íp panihni ded pah wã jummatdih ennit, yeebbút biíc yoobó ñi chãjaá.*

¹⁷ Páant ñi chãjat pínahdih náah yacnit, Timoteodih ñi pebhna wã wahna caá. Jesúih doonádih wã naáwáchah joinít, caanbút ã jepahachah, wã wũúh pah wã oini ã jumna caá. Nihat tútchinadih moón Jesúihwãdih ded pah bohéna, biíc yoobó wãpí chãjna caá. Ded pah wã chãjachah ennihi yeebdíhbut ã jwúub náhniabipna caá. ¹⁸ Obohjeéhtih, biquína yeéb nin pah ñi niíj jenah joiná caá: “Jwiít chah jéihnit caá. Dedé pínah Pablo jwiít dih ã jéih bohécan niít. Jwiít dih úumnit, ã jũóhbican nacaá”, ñi niíj jenah joiná yuh caá. ¹⁹ Obohjeéhtih, jwí Maáh ã wahachah, waícanjeh ñi pebhna wã juibíipna caá. Juibínit, páant niíj naóhnitabeh ded pah í chãjatdih wã enbipna caá. Jesúih doonádih í naáwáchah, ¿Bita í túut nuúm niít? ¿Oboh í niijátjeh caá? ²⁰ Queét Dios ã wēpatjīh yoobóp dih í naáwáchah, queétdih joinítboó jepahnit, í túut nuumbípna caá. Obohjeéhtih, páantjeh í naáwáchah, cáacwã í jepahcatdih wã jéihbipna caá. Jesúihwã jumna, ded pah naóhna, Dios ã wēpatjīh í chãjbipna caá. Oboh naóhna, í chãjcan niít. ²¹ Pánihna, ñi pebhna juibínit, wã juihñatdih náahcan, ñi túut nuúm páñaá. Páant ñi túut nuumáchah, ñi íp pah yeebdíh oinit, chaihjeh wã naóhbipna caá.

5

Yeejép yoobát pohba chãjnidih í yohat pínah

¹ Buu yeebdíh bainí wã jwúub naáwát túut caá. Ñi pebh chah yeejép chãjat doonádih wã joyóp be. Ñi cãtíh tubit yéej chãjni ã íp áadihjah át bíbohop wut be. Jesús dih jéihcannit páant yeejép ípí chãjcan caá. Obohjeéhtih,

* 4:16 1Co 11.1; Fil 3.17

yeéboó Jesúsdiŋ jéihnit jumna yuhna, páant ã chājatdih ñi enah bojna caá.* ² “Jwī Maáhdih túi jepahnit, jwiít dih dedé yéejat wihcan caá”, niŋ jenah joiná yuhna, tíccan, jíŋgahcan, caán yeejép chājnidih ñi túut nuumát túutcap be. Páant ñi túut nuumát túutcan, buu páantjeh ã yéej chājat jíib, yeéb ñi míic wáac junít, caandíh ñi jwúub waadát túutca bojoó. ³ Weémboó ñijeéh wihcan yuhna, caán doonádih joinít, búdí uúbhna wã chājap be. Pánihna, ñijeéh wã jumat pahjeh, ded pah caandíh ã yéejat peéh chājat pínahdih Jesús weemdíh ã jéihyanap be. ⁴⁻⁵ Páant ã jéihyanachah, nin pah yeebdíh wã niŋ naóhna caá: Caandíh ã yéejat peéh naáwát túut niijná, yeéb ñi míic wáacá. Pánih míic wáacna, ñijeéh wã jumat pah, Jesús ã wēpatjīh nin pah caandíh ñi niijí: “Jwī jwúub míic wáacachah, ma waadca bojoó. Nemépwã ĩ maáh ded pah meemdíh yeejép ã chājīhna, ã chāja naáh, ma jwúub túut nuumát pínah niijná. Pánih túut nuumnít, Jesús ã jwúub dei jūúwúchah, ājeéh ma bejat pínahdih meemdíh jwī náah yacna caá”, caandíh ñi niijí.

⁶ Pánih yéej chājni ñijeéh ã míic wáacachah, yeéboó “Jwiít Jesúsíhwã jwī túi jumna caá”, ñi niŋ jenah joyóchah yuhna, ã túican caá. Nin pah jwīpí niŋ naáwát dih ñi túi jéihna caá: “Búdí pan pínahdih ã paáát pínah bainíbitjeh jwī widichah yuhna, niŋhat āpí paa béjna caá”, jwī niijná caá. Pánihat pah, bícjeh ã yéejat dih cádahíhcan, niŋhat Dioíhwã bícdih míic wáacna, queétdihbut ã yéejabipna caá.* ⁷ Jwiít judíowã Pascuadih jeémát pínah chājnit, niŋhat paáát pínahdih jwīih muumánt yohnit, paacánni pandihjeh jwīpí chājna caá. Diosdih jwīpí mao wūhni oveja wūh pah, Dios ã enechah, yéejat wihcannit jwī jumat pínah niijná, Jesucristo jwiít dih át wun wūhup tají.

* 5:1 Dt 22.30 * 5:6 Gá 5.9

Pánihna, paáát pínahdih jwĩ yohat pah yeebdíhbut nihat ñi yéejatdih, ñi cātíh jumni yéejat cádahíhcannidihbut yohat caá náahap. Pánih yohna, paacánni pan dée, Dios ã enechah, yéejat wihcannit ñi jumbipna caá.* ⁸ Pánihna, túi wēinit, bícdih jumat túut niijná, nihat yeejép chājatdih, yeejép jenah joyát dihbut cádahnit, yoobópdi h jenah joinít, jwiít dih túi chājat caá náahap.*

⁹ Wã jwíih daác wahni núodih wã niijátji pah muntih, buu wã jwúub niij daácna caá, ñi túi beh joyát pínah niijná. “Í áa nihcannitjñh yeejép chājnit bícdih ñi jumca bojoó”, wã niij daacáp jĩ. ¹⁰ Páant niij daácna, “Jesúsdih jéihcannit yeejép chājnit”, niijná wã chājcan be. “Jesúsdih jéihcannit bí déedih en ñinahnitdih, nuumnít dih, pāpnidih úbhñitdihbut”, niijná wã chājcan be. Pánih chājnit nihat pebhboó í jumna caá. Íjeéh jumíhcan, dedboó ñi jweyát pínah áta wihcan taga. ¹¹ Obohjeéhtih, nin pah niijná wã chājav be: “ ‘Weém Jesúh caá’, niijná yuhna, nin pah chājnit bícdih ñi jumca bojoó: í áa nihcannitjñh yeejép chājnit, en ñinahnit, pāpnidih úbhñit, bitadih yee naóh yacnit, máihñit, nuumnít í jumuchah, queét bícdih ñi jumca bojoó”, niijná wã chājav be. Pánih chājnitdih numah jeémpcat caá yeebdíh náahap. Queébtut yeebdíh í numah jeémíhichah, ñi jepahca bojoó. ¹²⁻¹³ Weém Jesúsdih jéihcannitdih í yéejat peéh wã chājcan niít. Diosboó queétdih ã peéh chāj bipna caá. Obohjeéhtih jwíjeéh wáac junít Jesúh wã í yéej chājachah, jwiítboó queétdih peéh chājav caá náahap, í túi túut nuumát pínah niijná. Pánihna, ñijeéh jumni tūbit yeejép chājnidih ñi yohoó. Caandíh ñijeéh bícdih ñi jumat túutca bojoó.*

* 5:7 Ex 12.5 * 5:8 Ex 13.7; Dt 16.3 * 5:12-13 Dt 13.5; 17.7

6

Jesúshwājeh míic ámohat

¹ **Buu** biíh yeejép yapat doonádih joinít, bainí wā naóh-bipna caá. Yeéb Jesúsdih jéihnit jumna yuhna, chénewā míic jūihnit, ¿Dépanihna, ā yoobáát pínah niijná, Jesúsdih jéihcanni maáh pebhboó ñi bej? Jesúsdih jéihni pebhna ñi bejchah, yeebdíh ā túi yoobáát pínah niijná, Dios caánboodíh āta teo wáac taga. ²⁻³ Nindih ñi túi náhninaá: Jwí Maáh Jesús ā jwúub dei jūúwúchah, yéejnitdih caán biíc dih jwiít áilhwāboó jwí wutbipna caá. Ángelwādihtut jwí wutbipna caá. Nin baácboó jwí jum jwuhuchah, ¿Dépanihna, bainí míic jūihñat ā jumuchah yuhna, yeéb Jesúshwājeh ñi jéih yoobácan? ⁴ Queét maátadih wēi encan yuhna, ¿Dépanihna, nihat yeéb Jesúshwā míic jūihnit, ī yoobáát pínah niijná, queétdihjeh naáwádih ñipí bej? ⁵ Ñi tíicat pínah niijná, nindih wā naóhna caá: “Jwiít túi jéihnit caá”, niíj jenah joiná yuhna, míic jūihnitdih naóh yoobáni pínah ñijeéh ā wihcat pah ñi jumna caá. ⁶ Jesúshwā míicjeh míic jūihnit, Jesúsdih jéihcannit maáta pebhna naáwádih bejna, Jesúsdih jepahcannitbut ī joyóchah, ñipí naóh yacna caá. ¿Pánih chājna, ñi tíiccan niít?

⁷ Yeéb Jesúshwā míicjeh míic jūihnit, yeebdíh yoobáni pínah maátadih ñi bid bejchah, ā túican caá. Caanná bejcanjeh, yeebjéh ñi yoobánachah, āta túi tagaá. Obohjeéhtih, jéih míic ámohcan, “Ā jumna naáh”, ñi niijíchah, chah āta túi tagaá. Bitā ī jéih chāj numúchah, yeebjéh ñi jéih yoobácah, “Ā jumna naáh”, yeebdíh niiját caá náhap. ⁸ Obohjeéhtih, páant niijcánjeh, yeébbóo chah yeejép ñipí chājna caá. Bitā ī yeejép chājatdih, ī jéih chāj numát dih, biíc yoobó yeéb ñipí chājna caá. Yeéb Jesúshwā míic jumna yuhna, páant ñipí chājna caá.

⁹⁻¹⁰ Nindih ñi túi náhninaá: Det yeejép chājnit Dios pebhboó ĩ bejcan niít. Yeebjéh míc yeejanjeh, yooópdiĥ ñi jenah joyoó. Nin pah chājnit, Dios pebhboó ĩ bejcan niít: íí náah chājnit, pāpnidiĥ wúbhnit, ĩ áa nihcannitjĥ yéej chājnit, neoná mícjeh chājnit, yaádh mícjeh chājnit, nūmnít, bíí déedih en ñinahnit, máihnit, bitadiĥ yeejép doonádiĥ táoh naóhnit, jéih chāj nūmnítbut Dios pebhboó ĩ bejcan niít. ¹¹ Páant ĩ chājat pah biquína yeéboó ñi jumup jĥ. Obohjeéhtih, Jesucristodiĥ ñi jepahachah, ā wun wūhnit, ñi yéejatdiĥ āt yohop taga. Pánihna, bñ, Túini Espiritu ā teo wáacachah, Dioíhwā ñi jumuchah, yeebdĥ yéejat jĥib ā wihcan caá.

Jwíĥ bácahĥ chājcat caá náahap

¹² Bñ bííh yeejép yapatdiĥ bainí wā naóhbiĥna caá. Biquína yeéb “Jesucristodiĥ jepahni jumna, ‘Ma chājca bojó’, niiját weemdĥ ā wihcan caá”, ñi niĥ jenah joiná yuh caá. Obohjeéhtih, jwĥ yéej chājachah, ā túican caá. Bííh jwĥ chājachah, túini jumna yuhna, jwíĥ bácahdih, jwĥ jenah joyátđih yéejana, jwiítđih ā teo wáaccan caá. Biquí láana, páant chājatđih cádahĥna yuhna, jwĥ jéih cádahcan caá. Páant chājcat caá jwiítđih náahap.* ¹³ “Jwíĥ wudah jeémp yacat pínah caá”, niijnít, nūgúp tubuchah, jwĥpĥ jeémpna caá. Páant jwĥ chājachah, ā túina caá. Nin baáboó jum jwuhna, bíđ jeémpna, jwĥ túi jumna caá. Obohjeéhtih, Dios pebhboó jwĥ jumuchah, bíđ jeémát ā wihcan niít. Biquína “Jwíĥ bácah yaáhdđih metat pínah caá”, ñi niĥ jenah joiná yuh caá. Obohjeéhtih, pánihcan caá. Dios jwíĥ bácahdih chājna, caandĥ jwĥ teo wūhat pínah niijná, āt chājap tajĥ. Caanjéh caá jwĥ Maáh. ¹⁴ Dios Jesucristodiĥ boo pud jūwát túutnit, jwiítđihbut bíc yoobó ā wēpatjĥ ā boo pud jūwát túutbiĥna caá.

* 6:12 1Co 10.23

¹⁵⁻¹⁶ Nindihbut ñi túi náhninaá: Jwiít Jesúíhwā jumna, caán biíc dih biíc bácah dée jwí jumna caá. Génesisboó Dios nin pah át niíj daacát túutup tají: “Newé yadjíh biíc bácah dée í jumnipna caá”, át niíj daacát túutup tají.* Caandíh jéihnit, nin pahbut yeebdíh túi náhniat caá náahap: Ded newé yadjeéh ā jumuchah, queét biíc bácah dée í jumna caá. Pánihna, deoh nah jumnih wilijeéh ñi jumuchah, mijeéh biíc bácah dée ñi jumna caá. Mi jenah joyát pahjeh, yeebbát ñi jenah joibípna caá. ¿Dépanihna yeéb Jesúíhwā, ājeéh biíc bácah dée jumna yuhna, yeejép wilijeéh biíc bácah dée ñi jumíh? Páant chājat yeejép caá.

¹⁷ Obohjeéhtih yeébboó Jesúíhwā jumnit, ājeéh biíc bácah dée jumna, Túini Espíritu ñíih caolihboó ā jumuchah, caán ā jenah joyát pahjeh yeebbát ñi jenah joiná caá.

¹⁸ Yeebdíh ñi áa nihcannitjíh yeejép chājcat caá náahap. Pánih yéej chājnit nihna, chah jwííh bácahdih, jwí jenah joyátdihbut jwí yéejana caá. Páant jwí chājat túttimah, jwiít dih túut numát chah ā buona caá. Dedé biíh jwí yéej chājachah yuhna, túut numát nump ā buona caá.

¹⁹⁻²⁰ Nindih ñi túi náhninaá: Jwííh caolihboó ā jummat pínah niijná, Dios jwiít dih Túini Espíritudih át wahap jí. Páant ā wahachah, jwiítboó áih muu pánihni caá jwí jumup.* Dios Jesucristodih wah deyanit, jwiít dih ā wun wūhat pínah niijná, jwiít dih ā jíib chājap jí, áihwā jwí jummat pínah niijná. Pánih áihwā jumna, caán jwí maáh ā jumuchah, jwí weñat pínahdih jenah joicánjeh, ā weñat pínahdihjeh chājat caá náahap.

7

Téihya chéwat

* 6:15-16 Gn 2.24 * 6:19-20 1Co 3.16; 2Co 6.16

¹ **Buu** weemdih ñi **uúbh** joí daacátjidih wā jepahbipna caá. Nin pah ñit niíj **uúbh** joyóp tají: “¿Jwiít Jesús-dih jéihnit jwī áa **jumuchah**, ã túimi niít?” ñit niíj daacáp tají. Páant ñi niíj daacátjidih ennit, nin pah wā jepahna caá: Yeéb áa wihcannit ñi **jumuchah**, ã túina caá. ² Obohjeéhtih, páant ñi **jumuchah**, íí náah chājat ã tobohna caá. Pánihna, yeebdih áa **jumat caá náahap**. ³⁻⁴ Páant ñi áa **jumuchah**, yaádih bácah miíh pínahjeh nihcan caá. Mijeéh bóoíh pínah caá. Pánihna, mi áa mijeéh ã **jumíhichah**, caántdih jepahat caá náahap. Biíc yoobó newéíh bácah áih pínahjeh nihcan caá. Ájeéh bóliíh pínah caá. Pánihna, yad ájeéh mi **jumíhichah**, caandíhbut jepahat caá náahap. Pánih chājna, bitadih ñi bidcan niít. ⁵ “Diosdih túi **uúbat túut** niijná, biíc dih jwī **jum jwuhca boj jííh**”, ñi miíc niijíchah, ã túina caá. Obohjeéhtih, **uúbh** péanit, túi biíc dih ñi **jwúub jumúú**. Túbít maátáp dih cádahna, Satanásboó bitadih ã yéej chājat **túutuchah**, jéih yap yohcanjeh, ñi yéej chāj bipna caá.

⁶ Obohjeéhtih, “Ñi téihya chéweé”, niijnít, wā wutcan caá. Áa **jumna**, áa wihcatbut, biíc yoobó ã túina caá. Ñi íí náah chājcat pínah niijná, páant wā niíj naóhna caá. ⁷ Obohjeéhtih, “Weem páh queét nihat áa wihcannit í **jumuchah**, áta túi tagaá”, wā niíj jenah joiná caá. Biquínadih áa **jumat wēpatdih Dios** ã wūhna caá. Obohjeéhtih, bitadih áa wihcan yuhna, túi **jumat wēpatdihbut** ã wūhna caá.

⁸ **Buu**, áa wihcannitdih, éemp wunnitdihbut bainí wā naóh bipna caá. Yeébboó áa wihcannit ñi **jumuchah**, ã túi bipna caá. ⁹ Obohjeéhtih, yaddih, newédih búdí bidnit, íí náah chājcat **túut** niijná, ñi áa pínahdih ñi **uúúú**.

¹⁰⁻¹¹ **Buu**, yeéb Jesúsíhwā áa **jumnitboodih** bainí wā naóh bipna caá. Nin wā jenah joyátjeh nihcan caá. Dios ã wutat caá. Yaádh í áadih í cádahca bojo naáh. Neonábut

ĩ weha mána yaáhdhdi ĩ yohca bojo naáh. Obohjeéhtih, míic cádahnitji, biíhdih ĩ áa jumca bojo naáh. Pánih míic cádahnitji queét chénat pahjeh jwúub míic ámohna, biícdih jwúub jumnit, chah ã túibipna caá.*

¹² Вuu, yeéb bitadih jwuh bainí wã naóhbiipna caá. Biquína yeéb neoná Jesúsdi ĩ jepahachah yuhna, ĩi weha mána yaádhboó ĩ jepahcap jĩ. Yeéb Jesúsíhwã ĩi jumuchah yuhna, ĩijeéh ĩ jumíhichah, ĩi yohca bojó.

¹³ Biquína yeéb yaádhbut Jesúsdi ĩi jepahachah yuhna, ĩi weha mánaboó ĩ jepahcap jĩ. Páant ĩi jumuchah yuhna, ĩijeéh ĩ jumíhichah, ĩi cádahca bojó. ¹⁴ Yeéb biíc bácah dée ĩi jumuchah, biíc Jesúsíh jumna, biíh Jesúsíh níhcah yuhna, Dios yeebdíh ennit, “Queét wíhwã caá”, ã niijná caá.

Pánihna, Jesúsdi jepahcannit neoná ĩ weha mána yaádh Jesúsdi ĩ jepahachah, queét neonadíhbut Dios ã túi chãjbiipna caá. Biíc yoobó Jesúsdi jepahcannit yaádh ĩ weha mána Jesúsdi ĩ jepahachah, Dios queét yaáhdhdi ĩ túi chãjbiipna caá. Páant ĩi jumuchah, ĩi wehdih ennit, “Queébut wíhwã caá”, Dios ã niijná caá.

¹⁵ Obohjeéhtih biquína Jesúsdi jepahcannitboó ĩ weha mána yaáhdhdi, ĩ weha mánadihbut ĩpí cádahíhna caá. Pánih cádahíhna, míic maocat túut niijná, ĩ beje naáh.

¹⁶ Obohjeéhtih, túi biícdih ĩi jumuchah, chah ã túina caá. Yeéb Jesúsdi jéihnitboó ĩi weha mána Jesúsdi ĩ jepahat pínah, Dios queétdih ã túi ubat pínah niijná, ĩi jéih teo wáacmi nacaá. “Ĩ jepahbiipna caá. ĩ jepahcan níit”, jwĩ níj jéihcan caá.

¹⁷ Nin pah nihat Jesúsíhwãdih wãpí naóhna caá: Jesucristodi jepahnit, ded pah ĩi jumatiidih biíc yoobó ĩi jumúú. Páant ĩi jumati pínahdih jwĩ Maáh jéihnit, yeebdíh át jwejep taga. ¹⁸ Det Jesúsdi jepahnit bóodnitji jumna,

* 7:10-11 Mt 5.32; 19.9; Mr 10.11-12; Lc 16.18

ĩ náhni dahwaca bojo naáh. Obohjeéhtih, bóodcannit jumna, ĩ bóodat túutca bojo naáh. ¹⁹ Bóodnitdih, bóodcannitdihbut Dios biíc yoobó ã enna caá. ã wúatdih jwiítidih jepahat caá náahap. Pánih jepahnitdihjeh ã wēi enna caá. ²⁰ Dios yeebdíh áih pínahdih ã níó láa ded pah ñi jumati pah ñi túut nuumcá bojoó. ²¹ Teo wūhnit ñi jumuchah, ã túina caá. Páant ñi jumati ñi náhni dahwaca bojoó. Obohjeéhtih, ñi maáta yeebdíh watíhna, ĩ wata naáh. ã túimi nacaá. ²² Dios ã túi ubuchah, bitadih teo wūhnitboó jwí maáih jumna, watnit dée pah ĩ jumna caá. Bitadih teo wūhcannitboó Jesucristodih teo wūhnit caá. ²³ Jesúsíhwā ñi jumati pínah niijná, yeéb ñi yéejat jíib át wun wūhup tají. Pánih áihwā jumna, ã weñat pínahdihjeh yeebdíh chājat caá náahap. Yeebdíh bita Jesúsíh ĩ cádahat túutuchah, queétdih ñi joyáh bojoó. ²⁴ Pánihna, wā úudwā panihnitá, Jesúsíh jwíih jepahnit, yeéb nihat ded pah ñi jumati biíc yoobó ñi jumú. Páant ñi jumuchah, Dios yeebdíh wēi ennit, ã teo wáacipna caá.

²⁵ Bññ, áa wihcannitdih ñi wūbh joyátdih wā jepahbipna caá. Ded pah queét ĩ chājat pínahdih Dios ã wútcán caá. Obohjeéhtih, weém wā jenah joyátdihjeh wā naóhbirna caá. Dios weemdíh ã jígah en teo wáacachah, wā jenah joyátdih ñi túi joyóchah, ã túimi nacaá. ²⁶ Nin pah wā jenah joiná caá: Bññ yeó jáapna Jesúsíhwā tubit yeejép ĩ yapna caá. Ñi áa jumuchah, chah ã bñobipna caá. Pánihna, áa wihcannit jumna, áa wihcanjeh jumati caá náahap. ²⁷ Obohjeéhtih, áa jumnitboó ñi áadih yohcat caá náahap. Áa wihcannitboó ñi áa pínahdih bidcat caá náahap. ²⁸ Páant wā niijíchah yūhna, ñi áa pínahdih bid jūinít, téihya chéonit, ã túina caá. Obohjeéhtih, nin yeó jáapnadih áa jumnitboodíh chah ã bñobipna caá. Ñi áa wihcah, nump yeebdíh ã bñobipna caá.

²⁹ Páant niijnít, wã úudwã panihnitá, nin pah wã naóhna caá: Jesús ã jwúub dei jéúwát pínah bahnijeh ã júdhna caá. Pánihna, ded pah ã weñat pínahdih búdí jenah joyát caá náahap. Ñi weha mána yaádh í weñat pínahdih ñi jenah joyát chah, Jesús ã weñat pínahdih jenah joyát caá náahap. ³⁰ Jwí jígahat, jwí weñat, dedé pínah nihcan caá. Bíí déedih jíib chājna yuhna, bíbohcanit pah ñi jumúú. ³¹ Pánihna, Jesús ã wutatdih túi chājat túut niijná, nin baácboó jumnidih búdí wēi jenah joicát caá náahap. Ded pah Jesús ã wutatboodih jwiít dih túi jenah joyát caá náahap.

³² Bíí déedih jenah joicánjeh, Dios ã weñat pínahdih ñi túi jenah joyát dih yeebdíh búdí wã náah yacna caá. Áa wihcanniboó jwí Maáh ã weñat pínahdihjeh ded pah ã chājat pínahdih ã túi jenah joiná caá. ³³ Obohjeéhtih, áa jumniboó ájeéh bóli mi túi weñat pínah niijná, bíí déedihjeh ápí jenah joiná caá. ³⁴ Pánihna, Dioíh pínahdih ã jenah joicán caá. Yaádh dih búit bíic yoobó ã jumna caá. Caánt mi áa wihcan, jwí Maáh ã weñat pínahdihjeh ded pah mi chājat pínahdih mi túi jenah joiná caá. Dioíh wili mi jumna caá. Obohjeéhtih, áa jumna, newé ã weñat pínahdihjeh mi jenah joiná caá.

³⁵ Pánih naóhna, túi wēinit ñi jummat pínahdih yeebdíh wã náah yacna caá. Diosdihjeh túi oinit, ã weñat pínahdih jenah joinít, bíí déedih jenah joicánjeh, ñi túi jummat pínahdih caá wã náah yacap.

³⁶ Búu, bíih naáwát yeéb japatadih jwuh wã naóh bipna caá. Ñi náahnit yaádh í behechah enna, “Caántdih úb-nit, jwiít chénat pah jwí túi jum bipna caá”, niíj jenah joinít, ñi úbúú. Páant ñi úbúchah, yéejat nihcan niít. ³⁷ Obohjeéhtih, bíihboó “Áa wihcanni wã jumúchah, chah ã túi bipna caá”, ã niíj jenah joí dée caá. Páant caanjéh

niij jenah joiná, bita caandíh ï wutcah, ã jenah joyát pah chājna, caanbút ã túi chājna caá. ³⁸ Pánihna, ded ã áa pínahdíh ubnit, ã túi chājna caá. Obohjeéhtih, ded caántdih ubcan, chah ã túi chājna caá.

³⁹ Dedh áa jumnih, mi áa ã wuncah, caandíh cádahcat caá náahap. Obohjeéhtih, mijeéh bóo ã wunuchah, chéwat déedíh ã watachah, ded biíh áa wihcannidih náahna, mi jwúub áa jumuchah, ã túina caá. Obohjeéhtih, Jesúíhdihjeh mi níwi naáh. ⁴⁰ Weémboó nin pah wã niij jenah joiná caá: “Mi jwúub áa jumcan, chah mi wëibipna caá. Túini Espiritu caá weemdíh páant ã niij jenah joyát túutap be”, wã niij jenah joiná caá.

8

Pāpnidih ï wūhni déep

¹ Būu, biíh ñi uúbh joí daacátjidih wã jepahbipna caá. Nin pah ñit niij uúbh joyóp tajī: “¿Pāpnidih ï wūhni déepdih jwiít Jesúíhwã jwī jeéméchah, ã túimi niít? Í pāpni cáacwã ï chājnijeh caá. Dedé wēpat wihcan caá’, jwī niij jéihna caá”, ñit niij daacáp tajī. Páant niijnít, “Jwiít chah jéihnit caá”, niij jenah joinít pah ñit daacáp tajī. Páant ñi niij jenah joyát bitadih teo wáacat pínah nihcan caá. Bitadih oinit, queétdih túinijeh naáwát caá náahap. ² Ded “Weémboó nihatdih túi jéih beedáni caá”, niij jenah joiná yuhna, yoobópdih ã jéihcan caá. ³ Obohjeéhtih, ded Diosboodíh jéihni, caandíh oina, bitadih ã teo wáacbipna caá. Páant ã oyochah, Dios caandíhbut jéihnit, “Caán wíih caá. Wã oini caá”, ã niijná caá.

⁴ “¿Pāpnidih ï wūhni déepdih jwī jeéméchah, ã túimi niít?” ñi niij daacátjidih būu jwuh wã jepahbipna caá. “Pāpni báadhni nihcan caá. Dios biícjeh caá báadhni”, jwī niij jéihna caá. ⁵ Bitaboó dawádih “Nin wēpni, jwiítidih teo wáacni caá”, ï niij jenah joiná caá. Biquína widhdih,

cáiwãdih, yeodíhbut páant ípí níj jenah joiná caá. Bitá jeé doóbnadiah, máa nahnadiah, nuñúpwãdihbut páant ípí níj jenah joiná caá. “Nin jwiít dih wêp teo wáacni caá”, ï níj ní, dawá ã jumna yuh caá. ⁶ Obohjeéhtih, jwiítboó nin pah jwí níj jéihna caá: “Dios bícjeh, caánboó jwí íp caá”, jwí níj jéihna caá. Caán nihatdih át chãjap tají. Jwiít cáacwãdihbut át chãjap tají, áihwã jumna, caandíh jwí weñat pínah níj ná. Jwí Maáh Jesucristo bícjeh caá. Caandíh Dios nihatdih chãjat túutnit, jwiít dihbut át jummat túutap tají, Diosdih jwí weñat pínah níj ná.*

⁷ Obohjeéhtih, “Pãpni báadhcan caá”, jwí níj jéihyechah yuhna, bitaboó, Jesúh wã jumna yuhna, páant ï níj jéih jwuhcan caá. Jesús dih ï jepahat pínah játih, pãpnidih “Jwiít dih wêp teo wáacni caá”, níj jenah joinít, caandíh wëina, ï wũhni déepdih ípí jeémép tají. Pánihna, buubut Jesúh wã jumna yuhna, pãpnidih wũhni déepdih jeémpnit, pãpnidih ï jenah joiná caá. Obohjeéhtih, yoobópdih ï túi beh joi jwuhcan caá. Páant níj jenah joinít, “Páant wã jeéméchah, yéejat jíib weemdíh ã jum-bipna caá”, ï níj jenah joiná yuh caá. ⁸ Obohjeéhtih dedédih jwí jeéméchah, jwí jeémpcãhbut, Diosboó bícjeh yoobó jwiít dih ã enna caá. ⁹ Caán déepdih jwí jeéméchah, ã táyuchah yuhna, bitá Jesús dih jáap jéihnitdih jwíta yéjea tagaá. ¹⁰ Pãpnidih ï weñat pebhna waadnít, caandíh ï wũhni déepdih bitajeéh jwí jeéméchah ennit, “Caánboó Jesús dih túi jéihni páant ã jeéméchah, weemdíhbut ã túina nacaá”, ã níj jenah joibípna caá. Obohjeéhtih, “Pãpni ã wêpna caá”, páantjeh níj jenah joinít, jwúub jeémpna, ã túi chãjcan caá. ¹¹ “Weém túi jéihni caá”, níj jenah joinít, jwí jeéméchah, ã túina yuh caá. Obohjeéhtih, túi jéihnit jwí jummatdih jwí júutat jíib, bitá Jesúh wã jwí

* 8:6 Mal 2.10; Jn 1.3; Ro 11.36; Ef 4.6; Col 1.15-17

úudwā panihnit, jáap jéihnitdih jwī yéejabipna caá. Jesús queétdih ã wun wūhuchah yuhna, buudnit ī jum̄bipna caá. ¹² Jwī úudwā panihnitdih páant yéejanit, Jesucristodih caá jwī yéejanap.* ¹³ Pánihna, weémboó wā úudwā panihnitdih oinit, queétdih yéejacat túut niijná, pāpnidih wēinit ī wūhni déepdih wā jeémpan niít.

9

Jesús ã naáwát túutnit ded pah ī jum̄at

¹ Jesús ã bohénitji bíc yoobó weembút Jesúsdih wā enep jī. Páant caandih wā enechah, weemdihbut ã naáwát túutap jī. Pánihna, ded pah wā chājíchah, Jesúsboó ã wutuchah, ã túina caá. Weém caandih teo wūhni yeebdih áih doonádih wā naáwáchah joinít, ñi jepahap jī.* ² Áih doonádih jepahnit jum̄na, bitaboó “Pablo Jesús ã naáwát túutni nihcan caá”, ī niij jenah joyóchah yuhna, yeéboó weemdih ã wahatjidih ñi jéihna caá. Wā bohénachah joinít, jepahna, “Jesús ã wēpatjīh jwiít dih ã bohénap jī”, ñi niij jéihna caá.

³ Bitaboó nin pah īpí niijná caá: “Caánboó Jesús ã naáwát túutni nihcan caá”, ī niijíchah yuhna, queétdih bohéna, ñi túut numátjidih wāpí naóhna caá. ⁴ Cáacwādih jwī bohénachah, jeémát dih babhbatdihbut queétoó jwiít dih wūhat caá náahap. ⁵ Jesús úudwā, Pedrobut, nihat bita Jesús ã naáwát túutnitbut ī weha mána yaádh bícdih ī bohé jibichah, ded pah ī náahatdih īpí wūhna caá. Jwiítbut áa jum̄na nihna, queét yaádh dihbut jwī numah jibichah, jwī náahatdih yeebdih wūhat áta náahcan tagaá. ⁶ Nihat bohé jibnitdih ī bohénitboó dedé ī náahatdih īpí wūhna caá. Pánihna, weém Bernabéjīh jwī

* 8:12 Mt 25.45 * 9:1 Hch 9.3-6; 1Co 15.8; Gá 1.11-16

bohénachah, biíh tewatdih jwĩ teocat pínah niijná, jwiít chénat pahdih jwĩ náahatdih yeebdíh wũhat caá náahap. ⁷ Soldadowã queétjeh ĩ náahatdih ĩpĩ jĩb chãjcan caá. ĩ maátaboó queétdih ĩpĩ wũhna caá. Iguíh momnitboó ĩh iguíh quehechah, ĩpĩ jeémpna caá. Nihat ovejawãdih en daonítboó ĩh ovejawãdih ĩpĩ mao jeémpna caá. ⁸⁻⁹ Páant wã niját jwiít cáacwã jwĩ jenah joyátjeh nihcan caá. Moisésji nin pah át niij daacáp tajĩ: “Momo jwi trigo tíbnadĩh ã caóh chũñuchah, áih jacdih ñi chéoca bojoó, tíbnadĩh jeémíhna, ã jeémát pínah niijná”, át niij daacáp tajĩ.* ¿Páant ã niij daacát túutna, momo jiwidihjeh níft Dios át jenah joijíp?*

¹⁰ Nihcan caá. Jwiít bohé jibnitboodĩh át jenah joyóp tajĩ, cáacwãdih jwĩ bohénachah, jwiítĩh ĩ túi en dawát pínah niijná. Wãpchidih teonit, jeémátĩh ĩpĩ bidna caá. ¹¹ Jwiítbut momnit dée, yeebdĩh Jesúíh doonádih jwĩ túi bohénap jĩ. Páant jwĩ chãjachah, jwĩ náahatdih yeebdĩh wũhat át náahap ta yuh jĩ.* ¹² Pánihna, bita bohénitdih ñipĩ wũhat pah, jwiítĩhbut wũhat caá náahap.

Obohjeéhtih, páant wũhat yeebdĩh ã náahachah yuhna, ñi wũhcah ennit, jwiítboó jwĩ uúbh tac buugácap jĩ. Pánih uúbhcanjeh, búdí jwĩpĩ tewep jĩ. Jwĩ uúbúchah, nin pah ñita niij jenah joi tágaá: “Pablowã bií déedih náahnitjeh, ĩ bohéna caá”, niij jenah joinít, jwĩ bohénachah, ñita joíhcan tagaá. Pánihna, yeebdĩh bohéna, ded pah jwĩ náahatdih jwĩpĩ uúbhcap jĩ. ¹³ Obohjeéhtih, nindih ñi túi náhninaá: Dioíh mũuná juibínit, jwiít judíowã sacerdotewãdih mũñúpwãdih jwĩpĩ wũhna caá, Diosdih ĩ cáo wũhat pínah niijná. Dios queét sacerdotewãdih,

* 9:8-9 Dt 25.4 * 9:8-9 1Ti 5.18 * 9:11 Ro 15.27

bita caánboó teonitdihbut ĩ cáo jũdhni déepdih át jeémát túutap tajĩ.* ¹⁴ Pánihna, biíc yoobó jwĩ Maáh Jesucristo jwiít áih doonádih naóhnitdih jwĩ bohénitdih át en dawát túutap tajĩ.* ¹⁵ Páant ã wũtuchah yũhna, weémboó yeebdĩh wãpĩ úbhcap jĩ. Bũubut páant niij daácna yũhna, “Weemdĩh ñi teo wáacá”, niijná wã chãjcan caá. Weém nũgũp wũnna yũhna, wãta úbhcan tagaá. Wã úbhchah joinít, ñi wũhuchah, “Weém jíib wilcanni Jesúh túini doonádih wãpĩ bohéna caá”, wãta jéih niijcán tagaá.

¹⁶ “Jesúh túini doonádih wã bohéat jíib, Dios ã enechah, weém chah túini caá”, wãpĩ niij jenah joicán caá. Obohjeéhtih, Dios weemdĩh ã bohéat túutatdih chãjcan, tubit wãta jígah tagaá.* ¹⁷ Wã náahat pahjeh áih doonádih wã bohéna, wã bohénitboó weemdĩh ĩ jíib chãjat pínahdih wãta bid tagaá. Obohjeéhtih, wã bohéhichah, wã bohéhichah yũhna, biíc yoobó áih doonádih weemdĩh bohéat caá náahap. ã wũtuchah joinít, áih túini doonádih wãpĩ bohéna caá. Pánih jepahnit, weemdĩh ã wũhni tewatjeh ã jumuchah, wã bohéat jíib wãpĩ bidcan caá. ¹⁸ Pánihna, jíib bidcanjeh bohéna, búdí wã wẽina caá. Yeebdĩh bohénitdih en dawát ã náahachah yũhna, weémboó wãpĩ úbhcan caá.

¹⁹ Páant wã bohénachah, cáacwã jíib wũhcan, weemdĩh ĩ jéih wũtcan caá. Bitá ĩ weñat pínahdih chãjcan, Dios ded pah ã bohéat túutat pahjeh wãpĩ bohéna caá. Obohjeéhtih, pánih chãjna yũhna, bita ded pah ĩ jumatdih ennit, biíc yoobó wãpĩ jumna caá, weemdĩh wẽi ennit, túini doonádih wã naáwáchah joinít, ĩ jepahat pínah niijná.

* 9:13 Dt 18.1 * 9:14 Mt 10.10; Lc 10.7 * 9:16 Jer 20.9; Am 3.8

²⁰ Pánih chājna, wā úudwā panihnitá, bita judíowādih Jesúíh doonádih bohénit, ded pah í chājat biíc yoobó weembút wāpí chājna caá, wā naáwáchah wēi joinít, Jesúsdih í jepahat pínah niijná. “Nihat jwiít judíowā jwí n̄owā í wutadidih wā jepahcah yuhna, Dios weemdíh ā tūi enna caá”, wā niíj jéihna yuhna, queétdih bohénit, jwí n̄owā í wutadidih wāpí jepahna caá. ²¹ Bita judíowā nihcannit Moisés ā wutajidih jéihcannitdih bohéna, ded pah í jummat pah biíc yoobó wāpí jumna caá, wā bohénachah wēi joinít, í jepahat pínah niijná. Pánih jumna yuhna, Dios ā wutadidih wāpí yap yohcan caá. Ded pah Jesucristo weemdíh ā wutachah, caandíhbut wāpí jepahna caá. ²² Jáap jéihnitboodíh bohéna, “Weém Jesúsdih chah jéihni caá”, wāpí niijcán caá. Queétboó tūi beh joi jwáhcan, “Nin pah chājnit, wāta yéej chāj tagaá”, niíj jenah joinít, í chājcatdih weembút wāpí chājcan caá, queétdih teo wáacat tūit niijná. Pánihna, nihat í jummat biíc yoobó wāpí jumna caá, wā bohéatdih í tūi jepahachah, Dios queétdih ā tūi ubat pínah niijná. ²³ Jesúíh tūini doonádih nihat cáacwā í joyát pínah niijná, páant wāpí chājna caá. Pánih chājna, queét í jepahachah, Dios pehbboó jumna, jwiít biícidih jwí tūi wēibipna caá.

²⁴ Dios pehbboó juibínit, chah tūini ā wūhat pínahdih bidnit, nin baácboó jum jwuhna, ded pah ā wutadidih ní tūi jepahaá. Nin pah ā jumna caá: Cáacwā ñáonit, nihat í ñáwachah yuhna, chah wēpép ñáonidihjeh wēinit, tūinidih ípí wūhna caá. Pánihna, chah wēpép ñáoni dée jwiítbut Dios ā wutadidih tūi chājnit, ā pehbboó jwí juibínachah, jwiítidih wēinit, tūinidih ā wūhbirna caá. Pánih wēpép ñáoni dée, Dios ā weñat pínahdih tūi chājat caá náhap.

²⁵ Nin pahbut ā jumna caá: Ñáonitboó íih bácahdih ípí wē-

pana caá. Pánih wēpana, íih b́acahdih ýejaat ṕinahdih ípí ch́ajcan caá. Ćaacwá queétdih wēnít, núojih ṕeéb waoni júdudih í ẃahatdih ípí bidna caá. Obohjeéhtih, pánih ẃuhni júdudí waícanjeh ápí wunah bejna caá. Pánihat dée jwiítboó jwíih caolihdih ýejaíhcan, Diosdih ẃubhñit, á naáwátidibut jwípí jenah joiná caá. Pánih ch́ajñit, á pebhboó jwí jwibínachah, táinidih jwiítidih á ẃuhbipna caá. Caán á ẃuhni ṕinahboó á buudcán níit. ²⁶ Weémboó yoobópdiyhjeh ñáoni dée, Dios á weñat ṕinahdihjeh ch́ajjat túut níijná, caandíh wápí túi jenah joiná caá. Míc mao tíohnit yoobópdiyh í mao ch́úúát pah, weembút Jesús á wutadidih túi ch́ajjat túut níijná, Diosdih wá túi jenah joiná caá. ²⁷ Ñáonit, míc mao tíohnit íih b́acahdih ýejeacat túut níijná, í náahatdihjeh ípí ch́ajcan caá. Pánt í ch́ajjat pah, weembút wíih caolihdih ýejeacat túut níijná, wá náahatdih ch́ajcan, Dios á weñat ṕinahdihjeh wápí ch́ajna caá. Pánih ch́ajñit, Dios pebhboó wá jwibínachah, “Bitadidih ma bohénachah yuhna, dedé jíib ẃuhat ṕinah meemdíh á wihcan caá”, weemdíh á níijcán níit.

10

Egipto baácmant j́úóhñit ded pah í yapatji

¹⁻² Dios pebhboó jwibínit, jwiítidih wēnít, táinidih á ẃuhat ṕinahdih jwiít níhat jwí bidna caá. Pánih bidnit, jwiít judíowá jwí nuowá Egipto baácmant j́úóhna, ded pah í yapatjidih jwiítidih túi náhñiat caá náahap. Queét níhat Moisésjeéh í bejehah, Diosboó queétdih wapna, mah pōh panihñijih át waáwáp wut jí.* Muj Mac Dúunidih jōpanit, queét níhat Moisésjeéh Dios át ch́uh bejat túut wut jí.*

* 10:1-2 Ex 13.21-22 * 10:1-2 Ex 14.22-29

Pánih jumna, Moisésdih ït túi péenap wut jĩ. ³ Tútchi wihcapboó jumnit, Dios ã wũhni jeémátdih nihat ïpĩ jeémép wut jĩ.* ⁴ Muj wihcah, mah ã bac jũúwát pínah niijná, Dios Moisésdih búdí jee dáhdih át mawat túutur wut jĩ. Páant ã chãjachah, ã wũhni mahdih queét nihat ït babhwap wut jĩ. Jee dáhmant ï babhni mah ã bac jũúwát dée, Jesucristobut Túini Espíritudih át wũhup wut jĩ. ï jéih encah yuhna, Jesús ïjeéh ã jib bejehah, ã wũhni Túini Espiritu queétdih át teo wáacap wut jĩ.* ⁵ Obohjeéhtih, queétdih Dios búdí ã teo wáacachah yuhna, biquínajeh caandíh ït jepahap wut jĩ. Bitá dawá caandíh jepahcannitdih wēi encan, Dios queétdih át peéh chãjap wut jĩ. Pánihna, nihat Egipto baácmant jũóhnit, tútchi wihcapboó jib bejna, páantjeh ït wun beedép wut jĩ.*

⁶ Páant queét nihat ï yapatdih náhnina, biíc yoobó yeejép ï chãjat pah jwĩ chãjca boj jĩh.* ⁷ Dios ã daacát túutni tólih, Éxodo ï niijnídih, nin pah át niij daacát túutur tajĩ: “Queét cáacwã ï pãpnidih wēinit, biíc dih wēi jeémp babh máihna ït chãjap wut jĩ”, át niijíp tajĩ.* Páant ï yéej chãjat pah, jwiít dih chãjcat caá náahap. ⁸ Biíh láa biquína yaádh metnit, íí náah ït chãjap wut jĩ. Páant ï íí náah chãjat peéh biíc yeó jáapdihjeh veintitrés mil queétdih Dios át mawap wut jĩ.* Páant ï chãjat pah, jwiít dih chãjcat caá náahap. ⁹ Biíh láa, biquína nin pah Moisésdih ït niij jũihñup wut jĩ: “¿Dépanih tibeé jwiít dih Egipto baácmant ma ub jũóh? Nin tútchi wihcapboó jwĩ yabh jibna caá. Dios jwiít dih ã túi en daocán caá”, ït niijíp wut jĩ. Páant niijnít, Diosdih tac buugána, caandíh ït ïjanap wut jĩ. Páant ï yéejat peéh, Dios maiwãdih át

* 10:3 Ex 16.35 * 10:4 Ex 17.6; Nm 20.11 * 10:5 Nm 14.29-30 * 10:6 Nm 11.4 * 10:7 Ex 32.6 * 10:8 Nm 25.1-18

wahap wut jī, queédih ī chāác mawat pínah niijná.* Páant ī yapatdih jenah joinít, ī chājat pah jwiít dih chājcat caá náahap. ¹⁰ Biíh láa, biquína nin pah ít míic niijíp wut jī: “¿Dépanih tigaá Dios Moiséswādhjeh jwī maáta át chāj? Jwiít nihát biíc yoobó túinit jwī jumna caá”, míic niijnít, Diosdih ít jūihñup wut jī. Páant ī jūihñat peéh mawat pínah niijná, Dios áih ángeldih át wahap wut jī.* Páant ī chājat pah, jwiít dih chājcat caá náahap.

¹¹ Páant queét ī yapatji jwiít péeni yeó jáapna jumnitdih ā jéihyana caá. Ī yapatjidih Moisés ā daacátjidih ennit, túi jenah joinít, biíc yoobó jwiít dih chājcat caá náahap. ¹² “Weémboó Jesús dih wā chah túi jenah joiná caá. Dedé yéej chājat jenah joyát weemdih ā jūwúchah yuhna, wā túi jéih yap yohna caá”, niij jenah joiná, ñi túi chāja chaáh. Páant niij jenah joiná yuhna, jon játih moón ī chājat pah, ñi jwúub yéej chājmi nacaá. ¹³ Jwiít nihát biquí láana yeejép chājat jwī jenah joiná caá. Páant jwī yéej chājihichah yuhna, jwī yéej chājcat pínah niijná, Dios jwiít dih āpí teo wáacna caá. Pánih teo wáacna, namá déedih jwiít dih āpí jút na caá, jwī yap yohat pínah niijná. Pánihna, ded pah jwī bujác atdih jéihnit, chah yeejépdih jāhnit, jwiít dih āpí teo wáacna caá.

Pāpnidih wēicat

¹⁴ Wā chéenwā, nindih ñi túi joyoó: Bitá “Jwíih dios, jwiít dih teo wáacni caá”, Ī niij pāpnidih ī weñepboó be-
 jcanjeh, queét ī chājat biíc yoobó yeebbút ñi chājca bojoó. ¹⁵ Yeéb túi jéihnit jumna, ded pah ñi chājat pínahdih jéihyat túut niijná, nin wā naáwát dih yeebjéh ñi túi jenah joyoó: ¹⁶ Míic wáac jwinít, Jesús ih meép panihni iguñh macdih babhnit, áih bácah panihni pandihbút biíc dih jwī

* 10:9 Nm 21.5-6 * 10:10 Nm 16.41-49

jeémátdih bainí yeebdíh wã naóhbipna caá. Pánih babh, jeémpna, ã wun wũhatdih jenah joinít, “Túina caá”, jwĩpí niijná caá. “Jwiítdih wun wũhna, jwiít ãjeéh túi biícđih jwĩ jumuchah, ã wēpat jwiítdihbut ã wũhna caá”, jwĩ niij jéihna caá.* ¹⁷ “Jwĩ jeémpni pan biíc dahjeh ã jummat pah, jwiít nihat biícđih biíc báciah dée jwĩ jumna caá”, niij jéihnit, caán pan dahdih biícđih jwĩpí jeémpna caá.

¹⁸ Jwiít judíowã ded pah jwĩ chājatdih ñi jenah joyoó: Dioíh munná bejnit, nuñúpdih mao cáo wũhnit, Diosdih jwĩpí wēina caá. Caandíh jwĩ wũhat túttimah, caán déepdih jeémpna, Diosjĩh biícwã jwĩ jumna caá. Bitabut pāpnidih ĩ wũhniđidih jeémpna, queéťbut caanjĩh biícwã ĩ jumna caá.* ¹⁹ Páant niijnít, “Jwĩih dios caá”, niij pāpni, caandíh ĩ wũhniđit “Dedé wēpat ã jumna caá”, wã niijcán caá. ²⁰ Obohjeéhtih, dedé wēpat ã wihcah yũhna, bita caandíh jeémátdih wũhna, Diosdih jenah joicánjeh, nemépwãboodíhjenah jenah joinít, ĩ wũhna caá. Pánih wũh péanit, jwũub jeémpna, nemépwã biícđih ĩ jumna caá. Yeébbodíh nemépwã biícđih ñi jummatdih wã náah yaccan caá.* ²¹ Nemépwã biícđih jumna, Dios biícđih ñi jéih jumcan caá. Dios biícđih túi jummat túut niijná, nemépwã biícđih jumcat caá náahap. Pánihna, nemépwãđih ĩ wũhni jeémátdih ñi jeémpca bojoó. Caandíh wũhni babhbatdihbut ñi babhca bojoó. Jesucristo ã wun wũhatdih jenah joinít, caán biícđih jummat túut niijná, áih meép panihni iguĩh macđih babhna, áih báciah panihni pan dahdih jeémát caá náahap.* ²² Pāpnidih wũhniđi jeémátdih, Jesús ã wunatdih jenah joiní jeémátdihbut jeémpna, jwĩ Maáhdih ñi íjana caá. ¿Yeébbóó Diosdih

* 10:16 Mt 26.26-28; Mr 14.22-24; Lc 22.19-20

* 10:18 Lv 7.6

* 10:20

Dt 32.17 * 10:21 2Co 6.15-16

chah wēpnit niít ñi jəmɤp? ¿Ñi yéejat ã peéh chājatdih ñi jéih jweimí naniít? Nihcan caá. Pánihna, ã íjatdih úm-nit, nemépwādh ñi wāhniidih ñi jeémp, babhca bojoó.*

Bitadih oinit, teo wáacat

²³ Biquína yeéb nin pah ñi niíj jenah joiná caá: “Jesucristodih jepahni jəmna, ‘Ma chājca bojoó’, niiját weemdíh ã wihcan caá. Weemdíh yéej chājatjeh ã náahcan caá”, ñi niíj jenah joiná caá. Obohjeéhtih, biíh jwí chājachah, túini jəmna yəhna, jwiítidihjeh, bitadihbət ã teo wáaccan caá.* ²⁴ Pánihna, jwí weñat pínahdihjeh chājcan, bitadih jwí teo wáacat pínahdih chājat caá náahap.

²⁵ Déepdih jíib chājatboó jíib chājadih bejna, “¿Pāpnidih ñi wāhni niít? ¿Wā jeéméchah, ã túimi niít?” niíj úbh joicánjeh, jíib chājnit, ñi jeémé. ²⁶ Jwí íp Dios nihatdih ã chājni, nihat áih caá. Dedé jwí jeémát pínahdihbət chājnit, jwiítidih ã wāhna caá. Pánihna, ã wāhniidih jwí jeéméchah, ã túina caá.*

²⁷ Jesúsdi h jéihcanni yeebdíh ã numah jeéméchah, bejnit, dedé ã wāhuchah, “¿Nin pāpnidih ñi wāhni niít?” niíj úbh joicánjeh, ñi jeémé. ²⁸ Obohjeéhtih, Jesúsdi h jáap jéihni bət jəmna, “Nin déep pāpnidih ñi wāhni caá”, yeebdíh ã niijíchah joinít, caandíh ñi jeémpca bojoó. ²⁹ “Wā jeéméchah, ã túina caá”, niíj jéihna yəhna, jeémpnit, jwí Maáhdih jáap jéihni boodíh yeéb ñita yéjea tagaá. Obohjeéhtih, “Ñi jeémpca bojoó”, wā niijíchah joinít, nin pah weemdíh ñita niíj úbh joi tagaá. “Caandíh wā jeéméchah ã túyatdih jéihna yəhna, ¿Dépanihna jáap jéihni ã jenah joyát pah weemdíh chājat náah?*” ³⁰ Dedédih jeémpnit, ‘Ma wūhat túina caá, Paá’, wāpí niijná caá. Páant wā

* 10:22 Ex 20.5; Dt 32.21 * 10:23 1Co 6.12 * 10:26 Sal 24.1; 50.12; 89.11

* 10:29 1Co 8.7-12

niijíchah yǎhna, ¿Dépanihna, ‘Caandíh jeémpnit, ma yéej chājna caá’, weemdíh ma níj?’ ñita niij tágaá. ³¹ Páant níj naóhna, nin pah niijná caá wā chājay: Jwiít Jesúh-wādih túi chājat caá náahap, bita jwiítđih ennit, queébtut Diosdih ĩ weñat pínah niijná. Pánihna, jeémp, babh, dedédih chājna, bita Diosdih ĩ wēi naáwát pínah niijná, túi chājat caá náahap. ³² Judíowā, judíowā nihcannit, Jesúhwādihbut yeejép ñi chāj júutca bojoó. ³³ Weémboó dedé wā chājíhna, nihat cáacwā ĩ túi jummatdih jenah joinít, wāpí chājna caá. Pánihna, Jesúsđih ĩ jepahachah, Dios queéđđih ã túi ubat pínahđih búđí náah yacna, wā túi jummat pínahđih jenah joicánjeh, bita ĩ túi jummat pínahđih wāpí jenah joiná caá.

11

¹ Weém Jesucristo ded pah ã chājatjidih jenah joinít, biíc yoobó wāpí chājna caá. Páant wā chājat pah, yeebbát ded pah wā chājatđih ennit, biíc yoobó ñi chājaá.*

Míic wáacnit, ded pah ĩ chājat pínah

² Ded pah wā chājatjidih náhninit, yeéb biíc yoobó ñi túi chājna caá. Jesúh doonáđih jwí bohénachah joinít, páantjeh ñi túi jepahna caá. Páant ñi chājachah, yeebđih wā wēina caá.* ³ Bwú biíhđih wā naóhbipna caá, yeéb Jesúhwā míic wáacnit, ded pah ñi chājatđih ñi túi jéihyat pínah niijná. Nindih ñi náhninaá: Jwí íip Dios Jesucristo ã maáh caá. Jesús neoná ĩ maáh caá. Neoná ĩ weha mána yaáđh ĩ maáh caá. ⁴ Níih baácđih moón biíhđih jepahat júutna, níih waojíh yégueh chóojíh ñipí cáagna caá. Pánihna, Jesúh neonáboó úubhñit, Dios naáwátđih

* 11:1 1Co 4.16; Fil 3.17 * 11:2 2Ts 2.15

naóh yapanitbut jih cáagna, “Biíh caá wā maáh. Jesús nihcan caá”, niját júutat dée chājnit, jwí Maáh Jesucristodih yeejép ĩ chājna caá. ⁵ Yaádhboó uúbhna, Dios naáwátdih naóh yapanit, jih cáagcan, “Wājeéh bóodih wā jepahcan niít”, niját júutat dée chājnit, ĩ weha mánadih yeejép ĩ chājna caá. Mi áa nihcannijeéh yeejép chājnih wili, nihat miíh waó yoóc boj yohnih dée mi jumna caá. ⁶ Yaádhboó íih waojíh yégueh chóojíh cáaguíhcan, waó yoóc boj beedánih ĩ jumna naáh. Obohjeéhtih, boj beedáátdih tífcnit, ĩ jih cáaga naáh. ⁷ Diosdih uúbhna, neonáboó Dios ā nihat panihni jumna, íih wao dájhjih cáagcat caá náahap. Páant ĩ cáagcan, “Diosjeh caá wā maáh. Caánboó chah túini caá”, ĩ niját júutna caá. Yaádhboó cáagnit, “Wājeéh bóo túini caá. Caandíh wā wēi jepahna caá”, ĩ niját júutna caá.* ⁸ Dios cáacwátdih jwíh chājna, newédih át jwíh chājap wut jī. Túttimah áih páwájíh yaddih át chājap wut jī. ⁹ Newédih chājnit, yaddih teo wáacni pínah nihcan wut jī. Obohjeéhtih, yadboodíh newédih teo wáacnih pínah át chājap wut jī. Páant tigaá neoná maáh panihnit ĩ jumna caá.* ¹⁰ Yaáhdih wao dáh jih cáagat caá náahap, ĩ weha mánadih ĩ jepahat júutat túut niijná, Dioíh ángelwā ĩ wēi enat pínah but niijná. ¹¹ Obohjeéhtih, neoná ĩ weha mána yaádh ĩ maáh ĩ jumuchah yuhna, Jesúíhwā jumna, Dios queét chénat pahdih bíic yoobó ā enna caá. Pánihna, queétdih míic teo wáacat caá náahap. ¹² Dios newédih jwíh chājna, áih páwájíh yaddih át chājap wut jī. Búu yaádh caá neoná pínahdih ĩ weh jumna caá. Obohjeéhtih, Dios caá nihatdih ā chājap.

¹³ Míic wáacnit, ded pah ñi jummat pínahdih túi jéihyat túut niijná, yeejbéh ñi jenah joyoó. Níih tútchinadih

* 11:7 Gn 1.26-27 * 11:9 Gn 2.18-23

moón bitadilh ã jepahat júutíhna, íih waojíh yégueh chóo-
jĩh ípí cáagna caá. Pánihna, yaádhboó Diosdih wúbhñit,
ĩ weha mánadilh ã jepahat júutna, queétdih waojíh cáagat
caá náahap. ¹⁴ Ñi cātíh newé waó yoóc maátñi ã ðwúchah
ennit, “¿Caánboó yad wili pah waó yoóc ðwoná, ã tíccan
niít?” ñipí niíj jenah joiná caá. ¹⁵ Obohjeéhtih, yadboó
waó yoóc maátñi mi ðwúchah ennit, “Míih waó yoóc
maátñi ðwoná, mi túi jíghna caá”, ñipí niíj jenah joiná
caá. Pánihna, míih waó yoóc maátñi ðwonít, mijeéh
bóodih jepahat júutna caá mi chãjap. ¹⁶ Páant wã naáwát-
dih ded biíhboó mácah ã naáwíhichah, nin pahjeh wã
jepahna caá: Nihat jwiít yeebdíh bohénit wã naáwát-dih
biíc yoobó jwípí bohéna caá. Nihat nin baácnadh moón
Dioíhwãbut Diosdih wëinit, biíc yoobó ípí chãjna caá.

Jesús ã wutni jeémátdih ã túi chãjcat

¹⁷ Jesús ã wutni jeémátdih bæ bainí wã naóhñipna
caá. Míic wáacñit, Jesús ã wutni jeémátdih ded pah ñi
jeémát doonádih joinít, yeebdíh wã wëican caá. Jesús
ã naáwát-dih biíc yoobó chãjcan, caandíh ñi chah jenah
joyát pínahdih míic teo wáaccanjeh, ñi míic yéejana caá.
¹⁸ Pánih míic wáacñit, Jesús ã wunatdih náhnñit, biíc-dih
jeémát túut niijná yuhna, ¿Dépanihna, biíc-dih ñi jeémp-
can? Biquína dawá bií dée bíbohñit moh yéejñit biíc-dih ã
jeémíhcan caá. Bitaboó ã chéenwã biíc yoobó jenah joinít-
jeh biíc-dih ã jeémpna caá. Obohjeéhtih, biquína bitajeéh
ípí túi jeémpna caá. Pánih nihat biíc-dih jeémpcan, ded
pah Jesús ã bohéátdih ñi chãjcan caá. ¹⁹ Obohjeéhtih,
pánih jumna, det Jesús-dih túi jepahñit-dih, det Jesús-dih túi
jepahcannit-dihbut ñi jéihna caá. Páant ñi chãjcan, ñita
jéihcan tagaá. ²⁰⁻²¹ Ñi jeéméchah, bitadilh páicanjeh, ñi wã
jũóhni jeémátdih ñipí jeémpna caá. Páant ñi jeéméchah,

biquína moh yéejnitboó bainí jeémátdihjeh bíbohñit, túi jeémp chũúhcan, nuugúp ĩ wunna caá. Bitaboó búdí iguíh macdih ùb jũóhñit, bitadih wũhcanjeh, ĩ babh máihna caá. Pánih chãjna, “Jesús ã wutni jeémátdih jeémpna caá jwĩ chãjap”, niijná yũhna, yoobópdih ñi niijcán caá. ã wutni jeémát ã jumuchah, nihát ñi ùb jũóhni jeémátdih pãáhñit, bíicdih ñita wēi jeémp tagaá. Pánih jeémpna, túi bíicdih áih bácah pah ñita jum taga. ²² ĩÑi jenah joyoó bũca! ĩDépanihna tũbit nuugúp tubuchah yũhna, ñiĩh muúboojéh jum jwũhna, ñi jeémpcan? ĩDépanihna bita Jesúíhwã páant yeejép ñi chãj? ĩDépanihna Jesúíhwã moh yéejnitdih jígah encanjeh ñi tíica? ĩDed pah wã niijbí? ĩPáant ñi chãjachah, yeebdíh wã wēimi naniít? Nihcan caá. Wã wēican niít.

Jesús ã wutni jeémát ded pah ã jummat

²³ Jesucristojeh nin pah weemdíh ã jéihyanap jí, ã wun wũhatdih náhninit, ded pah pandih jeémp, iguíh macdih babhñit, jwĩ túi jeémát pínah niijná: Caandíh eníhcannit ĩ teoni pínah chei Jesús ã bohénitdih át numah jeémép wut jí. Pánih jeémpñit, jwĩ Maáh Jesús pan júdudih ùbñit, ²⁴ “**Nindih ma wũhat túina caá, Paá**”, niij péanit, ã bohénitdih át ói wũhup wut jí. Pánih ói wũhñit, nin pah át niijíp wut jí: **“Nin pan wíih bácah panihni caá. Yeéb ñi yéejat jíib wã wun wũhbipna caá.** Pánihna, nindih jeémpñit, wã wun wũhatdih ñi náhninaá”, át niijíp wut jí. ²⁵ Pánih jeémp péanit, Jesús pamapdihbut ùb, wũbhñit, nin pah queétdih át niijíp wut jí: **“Nin iguíh mac wíih meép panihni caá.** Wun wũhñit, jáap namá dée wã chãjbipna caá, Diosjeéh ñi túi jummat pínah niijná. Wã wun wũhatdih ñi túi jenah joyóchah, Dios ñi yéejatdih ã yohbipna caá, iiguípna bejnit déedih ã pebhboó ñi bejat pínah niijná. Pánihna, iguíh macdih babhñit, weemdíh ñi

náhninaá”, Jesús ã bohénitdih ãt niijíp wut jī.* ²⁶ Pánih pandih jeémp, iguúh macdih babhbat jumát pah “Jesús weemdíh ã wun wūhatdih wā túi jenah joiná caá”, niiját júutna caá jwī chājap. Pánihna, Jesús ã jwúub dei jūúwát pínah játih páantjeh jwiít áihwādih pandih jeémpnit, iguúh macdih babhbat caá náahap.

Jesús ã wutni jeémátdih ded pah ī jeémát pínah

²⁷ Jesucristo ã wun wūhatdih túi jenah joinít, bita Jesúh wādih oinit, pandih jeémp, iguúh macdih babhbat caá náahap. Ded jenah joicánjeh jeémpnit, babhna, Jesúh bácahdih áih meépdihbut “Dedé pínah nihcan caá”, niijnít, caandíh búdí ã yéej chājna caá. ²⁸ Ded ã jeémát pínah játih, ã yéej chājatdih jenah joyát caá náahap. Pánih jenah joinít, ã yéejatdih Diosdih naóh péanit, ã jeémé naáh. ²⁹ Jeémpnit, nin pah jenah joyát caá náahap: “Nin pan Jesúh bácah panihni, nin iguúh mac áih meép panihnidih enna, wā yéejat jíib weemdíh ã wun wūhatdih wā náhnina caá”, niij jenah joí, jeémpnit, ã babhba naáh. Páant niij jenah joicán, dedé yéejatdih naóhcan, ã jeéméchah, Diosboó caandíh ã peéh chāj bipna caá. ³⁰ Jesús ã wutni jeémátdih túi jenah joicánjeh ñi jeémát jíib, dawá tubúp chūhñit, bitabut it wunah bejep wut jī. ³¹ Obohjeéhtih, yeebjéh ded pah ñi yéejatdih jenah joinít naáwáchah, Diosboó yeebdíh áta peéh chājcan tagaá. ³² Pánihna, Dios buu yeebdíh peéh chājnit, bohéna caá ã chājap, túttimah iiguípna ñi bejcat pínah niijná.*

³³ Wā úudwā panihnitá, Jesús ã wutni jeémátdih jeémát túut niijná, míic wáacnit, nihatdih páinit, bícdih ñi túi jeémé. ³⁴ Nuugúp tubanitboó íih muúboó jum jwuhna, ī

* 11:25 Ex 24.6-8; Jer 31.31-34; Mt 26.27-28

* 11:32 Dt 8.5; He 12.5-11

jeémp wud jumə naáh. Pánihna, túinijeh ñi jeémé, Dios yeebdíh ã peéh chājat pínah niijná.

Ñi pebhna juibínit, bíh ñi úbh joí daacátjidih wā jepahbipna caá.

12

Túini Espíritu ã jéihyaat

¹ Bú Túini Espíritu ã jéihyaatnadih ñi úbh joyátdih wā jepahbipna caá, ñi túi jéihyat pínah niijná. ² Nindih ñi náhninaá: Yeéb Jesucristodih ñi jepahat pínah jātih, nemépwā ĩ maáh ñi nəowādh yeenit, ã jéih jepahcah yuhna, yeéb Corinto tútchidih moondíh pāpnitdh át úbát túutap tají. ³ Ded Túini Espíritu ã wēpatjīh naóhni, ded nemépwā ĩ wēpatjīh naóhndihbut ñi jéihyat pínah niijná, nin pah wā niij daácna caá: “Túini Espíritu ã wēpatjīh naóhni, ‘Jesucristo yeejép caá’, ĩ niijcán niít. Obohjeéhtih, nemépwāboó ĩ wēpatjīh naóhni, ‘Jesucristo Dios wūh, jwī Maáh caá’, ĩ jéih niijcán niít”, wā niijná caá.

⁴ Túini Espírituboó jwiít Jesúhwādh teo wáacna, mácah jéihyatnadih āpí wūhna caá. Obohjeéhtih, jéihyatna mácah ã juməchah yuhna, caán Túini Espíritu-jeh páant āpí teo wáacna caá. ⁵ Ded pah bitadih jwī teo wáaquíhichah, mácah ã juməchah yuhna, jwī Maáh Jesússeh jwiít nihatdih ã teo wáacat túutna caá. ⁶ Bitadih mácah jwī teo wáacachah yuhna, Dios ã wēpatjīh-jeh jwiít nihat jwī jéih teo wáacna caá. ⁷ Jwiít nihat Jesúhwādh Túini Espíritu ã wēpatjīh āpí teo wáacna caá, jwiítbut bita áihwādh jwī teo wáacat pínah niijná. ⁸ Biquína ã wēpatjīh, “Nin pah meemdíh chājat caá náahap”, ĩ niij jéih naóh yapana caá. Bitā ã wēpatjīh ded pah yapatdih, ded pah yapat pínahdihbut ĩ túi jéih naóh yapana caá. ⁹ Bitā ã wēpatjīh, Diosdih chah jenah joinít, bíhdih ĩ jéih

teo wáacna caá. Bitabut wənnitdih teo jáhanit, ĩ jéih booana caá. ¹⁰ Bitabut cáacwā ĩ jéih chājca naáhdih ĩ chājna caá. Bita Dios ā naáwáchah, ĩ jéih naóh yapana caá. Bita ded Túini Espíritu jumnidih, ded nemép jumnidihbut ĩ beh enna caá. Bitabut ā wəpatjĭh mácah wéheatjĭh ĩ jéih naóhna caá. Bita mácah wéheatjĭh ĩ naáwáchah joinít, ĩ jéih naóh yapana caá. ¹¹ Pánihna, nihat mácah ā jumuchah yuhna, Túini Espíritujeh ā weñat pínahdih chājnit, queét nihatdih apí teo wáacna caá.*

Jesúihwā biíc bácah pah jwĭ jummat

¹² Jwĭih bácah biícjeh ā jumuchah yuhna, téihyana jum, quíib dahna jum, jítchana jum, moli chónabut ā jumna caá. Obohjeéhtih, dawá ā jumuchah yuhna, nihat jwĭih bácahdih jumnijeh caá. Pánihat pah, jwiít Jesúihwā dawá jumna yuhna, jwiít nihat biícđih áih bácah dée jwĭ jumna caá.* ¹³ Biquína judíowā, bita judíowā nihcannitbut jum, biquína teo wūhnit, bita teo wūhcannitbut jwĭ jumna caá. Obohjeéhtih, jwiít nihat mácah jwĭ jumuchah yuhna, jwiítđih teo wáacni Túini Espíritu biícjeh jumna, jwiítđih waadnít, jwiít nihatdih biíc bácah pah át chājap taga.

¹⁴ Jwĭih bácahdih jumni biícjeh nihcan, dawá ā jumna caá. ¹⁵ Jwĭih jítcha wéheni nihna, “Caán téihya chah túini caá. Weémboó téihya nihcan, nin bácahdih jumni pínah nihcan caá”, ā niijíchah yuhna, bácahdih jumni páantjeh āta jum tagaá. ¹⁶ Jwĭih molítboó “Weém quíib dah nihcan, nin bácahdih jumni pínah nihcan caá”, ā niijíchah yuhna, bácahdih jumni páantjeh āta jum tagaá. ¹⁷ Obohjeéhtih, jwĭih bácahdih quíib dahjeh jumna, molít wihcah, ¿ded pah tigaá jwĭta jéih joí? Molítjeh jumna,

* 12:11 Ro 12.6-8 * 12:12 Ro 12.4-5; Ef 4.14-16

wuúć íit wihcah, ģded pah tigaá jwīta jéih jōí? ¹⁸ Pánihna, nihat bácah jumnidih jwī náahna caá. Diosboó túi jéihni jwiítidih chājni ded pah ā náahatdih nihat jwīih bácahdih jumni pínahdih āt chājjip taga, jwī túi jummat pínah niijná. ¹⁹ Jwīih bácahdih quíib dahjeh, jítchajeh, téihyajeh ā jumuchah, jwīta jéih jumcan tagaá. ²⁰ Pánihna, dawá bácahdih jumni ā jumuchah yuhna, biíc bácahjeh ā jumna caá.

²¹ Jwīih quíib dahboó “Weém nihat jéihni caá. Dedé weemdih jumhdcan caá. Pánih jumna, caán téihya ā teo wáacat pínahdih wā náahcan caá”, ā niijíchah yuhna, ā teo wáacat ā náahna caá. Jwīih wao dáhboó “Dedé weemdih jumhdcan caá. Pánih jumna, caán jítchadidih wā náahcan caá”, ā niijíchah yuhna, caandih ā náahna caá. ²² “Wīih bácahdih jumni túi wēpcanni caá”, jwī niij jenah joiníboó chah ā náahna caá. ²³ “Túi jígohcanni caá”, jwī niij jenah joiná, túini yéguehdih jwīpí daoná caá, túi jígohat túut niijná. Tíicnit, jwīpí jáhna caá, bita ī encat pínah niijná. ²⁴ “Bita ī enechah, dedé pínah nihcan caá”, jwī niij jenah joinídih jwīpí jáhcan caá. “Wēpcanni caá. Túi jígohcanni caá. Tíic náah jumni caá”, jwī niij jenah joinídih chah jwīpí túi en daoná caá. Páant tigaá Dios āt chājap taga, ²⁵ míc jūihñat dée wihcanjeh, nihat ā túi míc teo wáacat pínah niijná. ²⁶ Pánihna, jwīih quíib dah tubna, nihat bácah ā tubana caá. Quíib tubat ā yayáchah, nihat jwīih bácah ā túina caá.

²⁷ Yeéb nihat Corinto tútchididih moón Jesúhwā áih bácah dée ñi jumna caá. Pánihna, jwīih bácahdih jumni nihat ā chājat pínah mácah ā jummat pah, yeebbút Jesúh bácahdih jumnit dée, ñi chājat pínahbut mácah ā jumna caá. ²⁸ Nihat Jesúhwā biícidih jumnit, Túini Espíritu ā

wēpatjīh mácah jéihyatnadih Dios át wēhəp taga. Dios ā jwīih ñíonitboó Jesús ā naáwát tútnit ī jumna caá. Túttimah, Dios naáwátdih naóh yapanit ī jumna caá. Túttimah, ā naáwátdih bohénit ī jumna caá. Túini Espíritu ā wēpatjīh cáacwā ī jéih chājca naáhdih biquína ī chājna caá. Biquínaboó wunnitdih teo jáha úbhnit, ā wēpatjīh ī jéih booana caá. Bitaboó, bitadih jígah ennit, ípí teo wáacna caá. Bitaboó, cáacwādhí túi waóhnit pínah ī jumna caá. Bitaboó, ā wēpatjīh, mácah wéheatjīh ī naóhna caá.* ²⁹ Yeéb nihat Jesús ā naáwát tútnit nihcan caá. Nihat Dios naáwátdih naóh yapanit pínah, nihat ā naáwátdih bohénit pínah, nihat wēp chājnit pínahbət nihcan caá. ³⁰ Nihat boonanit pínah, nihat mácah wéheatdih naóhnit pínah, nihat mácah wéheatdih jwúub túut nuúm naóh yapanit pínahbət nihcan caá. ³¹ Jwiít biquínadiah nihat jéihyatna ā wihcan caá. Diosjeh caá áih cáacwādhí ā jéihyana caá. Chah túini jéihyat pínahdih bidna, jwiít nihatdih caandíh búdí úbát caá náahap. Obohjeéhtih, bitadih jwī oyat pínah caá chah náahap. Pánih oina, Túini Espíritu ā wēpatjīh bitadih jwī túi teo wáacpina caá. Jwī oican, Túini Espíritu jwiítdih ā teo wáacachah yuhna, bitadih jwī túi teo wáaccan níit.

13

Oyat

¹ Túini Espíritu ā wēpatjīh mácah wéheatjīh wéhenit, bita ī wéheat, ángelwā ī wéheatjīh wéhena yuhna, bitadih jwī oicah, dedé pínah nihcan caá. Yéej yáaatjeh caá. ² Túini Espíritu ā wēpatjīh Dios ā naáwáchah, jwī jéih naóh yapana yuhna, bitadih jwī oicah, dedé pínah nihcan caá. Ded pah Dios ā jumatdih, ā chājat pínahdihbət túi

* 12:28 Ef 4.11

jéihna yuhna, bitadilh jwĩ oicah, dedé pínah nihcan caá. Jwiít cáacwã jwĩ jéih chājca naáhdilh Dios ã wēpatjĩh jwĩ jéih chājat pínahdilh túi jenah joiná yuhna, bitadilh jwĩ oicah, Dios ã enechah, dedé pínah nihcan caá.* ³ Nihat jwĩ bíbohatdilh moh yéejnitdilh jwĩ wūhuchah yuhna, Jesúíh doonádilh jwĩ naáwát peéh bita jwiítidilh ĩ cáwachah yuhna, bitadilh jwĩ oicah, Dios jwiítidilh wēi encan, túinidilh ã wūhcan niít.

⁴ Bitadilh oina, ded pah jwiítidilh ĩ yéej chājachah yuhna, yéej chāj jwūbacan, túinijeh jwĩ jum̄bipna caá. Bitadilh oina, jígah ennit, jwĩ teo wáac̄bipna caá. Queétdilh oina, íih bíí déedilh en ñinahcan, ded pah ĩ túi yapachah, jwĩ íjcan niít. Pánih oina, queét jwiítidilh ĩ wēi enat pínah niijná, ded pah jwĩ túi jum̄at, jwĩ túi yapat, jwĩ túi chājatdih̄but jwĩ naóhcan niít. “Weém nihat jéihni caá. Dedé judhd̄at weemd̄ilh wihcan caá”, niijní pah jwĩ jum̄can niít. ⁵ Bitadilh oina, queétdilh jwĩ tíicacan niít. Pánih oina, chah túinidilh jwiítjeh bíbohat túut niijná, jwĩ bidcan niít. Pánih oina, ded pah jwiítidilh bainí yeejép ĩ chājachah yuhna, waícanjeh jwĩ íjcan niít. Jwiítidilh ĩ yéej chājatjidilh jwĩ quíib̄ buud̄b̄ipna caá. ⁶ Bitadilh oina, yeejép ĩ yapachah, yeejép ĩ chājachahbut, jwĩ wēican niít. Obohjeéhtih, túini ĩ yapachah, yoobóp̄dilh ĩ chājachahbut, jwĩ wēib̄ipna caá. ⁷ Bitadilh oina, ĩ yéej chājat doonádilh bitadilh naóhcan, ĩ túi chājíhatdilh jenah joinít, Dios queétdilh ã túut̄ nuum̄át pínahd̄ilh jwĩ túi jenah joí cádahcan niít. Pánihna, ded pah jwĩ yapachah yuhna, jwĩ oi cádahcan niít.

⁸ “Ñi m̄íc oyoó”, niíj w̄utnit, Dios “Páant b̄ojeh tiguaá. Yeebd̄ilh buū oyat náahcan caá”, ã niijcán niít. Obohjeéhtih táttimah, Túini Esp̄ritu ã wēpatjĩh Dios naáwát-dilh naóh yapaat, mácah wéheatjĩh naáwátbut, ded pah

* 13:2 Mt 17.20; 21.21; Mr 11.23

yapatdih, ded pah yapat pínahdih jéihyatbut dedé náahat ã wihcan niít. ⁹ Nin baácboó jum jwuhna, Túini Espíritu ã teo wáacachah yuhna, nihatdih túi jéih beedácan, nihat Dios naáwátidihbut túi yoobópdih jwí jéih naóh yapacan caá. ¹⁰ Obohjeéhtih, Jesucristo, túini yoobát jumni, ã jwúub dei jūwúchah, nihatdih jwí jéih beedábipna caá.

¹¹ Nin pah jwí jumna caá: Weém wébít jumna, wébít ĩ jenah joyát, ĩ wéheat pahbut, weembút jenah joinít, wā wéhenap jī. Obohjeéhtih, buu behe jumna, wébít ĩ chājat pah wā chājcan caá. ¹² Nin pahbut ã jumna caá: Maa quenalih naajīh jwí túi míc encan caá. Pánihat dée Diosdih buu jwí jéih encan caá. Túttimah, jwiít chénaboó caandīh jwí míc jwāáh enbipna caá. Nin baácboó jum jwuhna, Diosdih jwí jéih beedácan caá. Obohjeéhtih, ã pehbhoó juibína, jwiítidih buu ã jéih beedáat pah, jwiítbut caandīh jwí jéih beedábipna caá.*

¹³ Nin baácboó jum jwuhna, jwiítidih nin pah chājat caá náahap: Diosdih túi jenah joí cádahcan, jwiítidih ã túi chājat pínahdih páantjeh náhnina, caandīh, bitadihbut oi cádahcat caá náahap. Obohjeéhtih, oyat caá jwiítidih chah náahap.

14

Mácah wéheat, Dios naáwátidih naóh yapaat

¹ Míc oyat jwiítidih chah ã náahachah yuhna, Túini Espíritu ã jéihyaatnadihbut jwiítidih bidat caá náahap. Dios naáwátidih naóh yapaat wēpatdih chah bidat caá náahap, míc wáac juinít, ñi jéih míc teo wáacat túut ni-ijná. ² Mácah wéheatjīh naóhnitboó cáacwādh wéhecan, Diosdihjeh ĩ wéhena caá. Túini Espíritu ã wēpatjīh, Dios ã jéihyaatdih ĩ naáwáchah yuhna, nihat cáacwā ĩpí beh

* 13:12 1Jn 3.2

joicán caá. ³ Obohjeéhtih, Túini Espíritu ã wēpatjīh Dios naáwátdih naóh yapanitboó cáacwāboodīh ī wéhena caá. Diosdih chah ī túi jenah joyát pínah niijná; ded pah queétdih ã chājat túutardih chah túi beh joinít, ī jepahat pínah niijná; ī jígahatdih, ī úumatdihbut ã yayát pínah niijná; páant ī niīj naóh yapana caá. ⁴ Mácah wéhene áih caolihdihjeh Túini Espíritu ã teo wáacna caá. Obohjeéhtih, Dios naáwátdih naóh yapaniboó Dioíhwā wáac jumítdih ã teo wáacna caá.

⁵ Yeéb nihat mácah wéheatjīh ñi wéheatdih náah yacna yuhna, Dios naáwátdih naóh yapaatdih chah wā náah yacna caá. Naóh yapaniboó Dioíhwādh chah ã teo wáacna caá. Obohjeéhtih, mácah wéheatjīh naóhni, caandīh jwūub túut numnījīh biícđih naóhni, Dios naáwátdih naóh yapani biíc yoobó áihwādh ī teo wáacna caá. ⁶ Wā úudwā panihnitá, weém ñi pebhboó juibíni, mácah wéheatjīhjih wā naáwáchah, yeebdīh áta teo wáaccan tagaá. Obohjeéhtih, ded pah Dios ã jéihyaatdih naóh yapanit, ded pah jwī chājat pínahdh naóh bohénit, yeebdīh wā túi teo wáacp jī.

⁷ Nin pah ã jumna caá: Pelatdih, chíó nahdh yoobópdih jwī póojcah, joinítboó jwī póojatdih ī beh joicán niít. Bíitatdihbut yoobópdih jwī bíitcah, bitaboó jwījeéh ī jéih eocan niít. ⁸ Póojat nahdh yoobópdih jwī póojcah, joinítboó beh joicán, míic mawatdih teo wáacadih ī bejcan niít. ⁹ Pánihat dée, joinítīh wéheatjīh yoobópdih ñi naóhcah, ī beh joicán niít. Ñi naáwáchah yuhna, queétdih dedé pínah nihcan niít. ¹⁰ Nin pahbut ã jumna caá: Nin baácboó dawá wéheatna ã jumna caá. Cáacwā íih wéheatjīhjih wéhena, ī míic beh joiná caá. ¹¹ Obohjeéhtih, weemdīh naóhniíh wéheatdih beh joicán, jwī jéih míic wéhecan caá. ¹² Pánihat pah, joinítīh wéheatjīh naóhcan, ī beh joicáh,

yeebbút queédih ñi jéih teo wáaccan caá. Pánihna, Dioíh-wādhíh teo wáacat pínah niijná, Túini Espíritu ã wēhni jéihyaatnadih búdí ñi bidií.

¹³ Dioíhwādhíh teo wáacat túut niijná, mácah wéheatjīh naóhnihoodíh jwúub túut nuumát pínahdihbut úúbát caá náahap. ¹⁴ Beh joicán yuhna, wíih caolihboó mácah wéheatjīh wā túi úúbhna caá. Páant wā úúbúchah, wíih caolihdih ã teo wáacna caá. Wíih wéheatjīh wā úúbúchah, wíih jenah joyáthoodíh ã teo wáacna caá. ¹⁵ Pánihna, mácah wéheatjīh úúbhnit, wíih wéheatjīh-but wā úúbhnipna caá. Mácah wéheatjīh eonit, wíih wéheatjīhbut wā eobipna caá. ¹⁶ Míic wáac jūinít, mácah wéheatjīhjuh Diosdih ñi weñechah, jéih jwuhcanni ñi cātíh jumna, ñi naáwát dih beh joicán, “Páant tigaá”, ã jéih niijcán níít. ¹⁷ “Túina caá, Maá”, yoobópdih ñi niijíchah yuhna, ñi niiját caán jáap jūiníhoodíh ã teo wáaccan níít. ¹⁸ Mácah wéheatjīh yeéb ñi úúbát chah weémboó pánih úúbhna, wēinit, “Túina caá, Paá”, Diosdih wāpí niijná caá. ¹⁹ Obohjeéhtih, pánih úúbhna yuhna, Jesúíhwā jwí míic wáac jūinít, yeebdíh ã teo wáacat pínah niijná, daocánni jacnabitjuh ñíih wéheatjīh naóhna, chah wāta wēi tagaá. Díez mil jacnadih mácah wéheatjīh wā naáwáchah yuhna, yeebdíh ã teo wáaccan, wāta wēican taga.

²⁰ Wā úudwā panihnitá, wébít í jenah joyát pah ñi jenah joicá bojoó. Obohjeéhtih, yéej chājatdih jenah joicánnit í jummat pah yeebbút bíic yoobó ñi jumúú. Behnit í jenah joyát pah mácah wéheatna ded pah ã jummat pínahdih túi jenah joinít yeebdíh jummat caá náahap. ²¹ Yeébboó nin pah ñipí níj jenah joiná caá: “Dios weemdíh túi wēinit, mácah wéheatdih át jéihyanap be”, ñi níj jenah joiná yuh caá. Obohjeéhtih, Dios ã wēi enat jútut pínah nihcan caá. Dios naáwát dih naóh yapani Isaías nin pah

ã niij daacátjidih ñi táí jenah joyoó: “Dios nin pah ã niijná caá: ‘Wíih judíowādih peéh chājat túut niijná, ĩ pebhna biíh baácđih moonđih wā wahbipna caá. Játih wā naáwátđih naóh yapanit judíowā ĩh wéheatjĭhjih ĩ naáwáchah yuhna, ĩ jepahcap jĭ. Bũũ peéh chājat túutna, judíowā ĩ wéheatđih wéhecannit ĩ naáwáchah, páantjeh weemđih ĩ jepahcan niít’, jwĩ Maáh ã niijná caá”, Isaiás át niij daacáp tajĭ.* ²² Pánihna, mácah wéheatna Dios áihwādih ã wēi enat júutat pínah nihcan caá. Ñi míic wáac juyúchah, caandĭh jepahcannitboó mácah wéheatnadih joinít, Isaiás ã daacátjidih náhninit, Diosđih ĩ jepahcatji jíib ã peéh chājat pínahđih ĩ jenah joibípna caá. Obohjeéhtih, yeéb Jesúhwāboó Dios naáwátđih ñi naóh yapanachah joinít, yeebđih teo wáacnit, jepahcannitboodĭh ã teo wáaccan niít. ²³ Míic wáac jwinít, yeéb dawá mácah wéheatjĭh ñi naáwáchah, bita jéihcannit, Jesúsđih jepahcannitboó waád jwinít, “Queét mácah wéheatjĭh naóhñit jenah joicánnitjeh caá”, ĩ niij jenah joibípna caá. ²⁴⁻²⁵ Obohjeéhtih, yeéb Dios naáwátđih ñi naóh yapanachah joinít, Jesúsđih jepah jwuhcanni nin pah ã niij jenah joibípna caá: “Weém yéejni caá. Dios ninboó jumnit, wā jenah joyátđih jéih beedáni jumna, nitđihbút át jéihyanap taga”, ã niij jenah joibípna caá. Páant niij jenah joinít, bóđicha caj yoh ñajnit, “Dios, meém nihat jéihni, túini caá”, niijnít, Jesúsđih ã jepahbipna caá.

Wáac jwinít, túinijeh jummat

²⁶ Diosđih weñat túut niijná, míic wáac jwinít, túinijeh chājat caá náahap. Yeéb nihat ñi naáwáchah, ã túina caá. Obohjeéhtih, nihat bícđih ñi niijcá bojoó. Túini Espiritu biquínadih ewat ã wūhuchah, Diosđih wēi ewat caá náahap. Bíhđih bohéátđih ã wūhuchah, naáwát caá náahap.

* 14:21 Is 28.11-12

Biíhdih Túini Espíritu ã jéihyanachah, caandíhbut naáwát caá náahap. Biíhdih Túini Espíritu ã wēpatjīh mácah wéheatjīh ã naáwáchah, jwúub túut nuúm naáwát caá náahap. Pánihna, Túini Espíritu ded pah ã teo wáacachah, Jesúsdi h chah túi jenah joyát túut niijná, yeebdíh naáwát caá náahap. ²⁷ Mácah wéheatjīh naáwíhna, chénewã, biíc peihcannitjeh biquínajeh ĩ naáwá naáh. ĩ naáwát dih jwúub túut nuumníbut ã naáwá naáh, yeéb ni hat ĩi beh joyát pínah niijná. ²⁸ Obohjeéhtih, mácah wéheatdih jwúub túut nuumní pínah wihcah, wáac jwinít dih ã naóhca bojo naáh. Caanjéh caolih díitboó Diosdih ã úúbú naáh.

²⁹ Túini Espíritu ã teo wáacachah, Dios naáwát dih biquína ĩ naóh yapana naáh. Queét ĩ naóh yapanachah, joinítboodíh túi jenah joyát caá náahap, “¿Túini Espíritu ã naáwát túutni níit?” níj jéihyat túut niijná. ³⁰ Páant ã naáwáchahjeh, biíhdih Túini Espíritu ã naáwát túutuchah, jwíh naóhniboodíh yayát caá náahap, biíh jwuh ã naáwát pínah niijná. ³¹ Nihat biíc dih naóh yapacan, biquínajeh ni hat naóh yapaat caá náahap, ni hat míc wáac jwinítboó ĩ bohéat pínah, ĩ weñat pínah, chah ĩ túi jumat pínah niijná. ³² Túini Espírituboó ã naáwát túutuchah joiná, naóhni pínahboó “¿Débólíh caá wã naóhbi, queédíh wã túi teo wáacat túut niijná?” níj jenah joyát caá náahap. ³³ Páant níj jenah joiná, Dios ã náah yacat pah túinijeh ĩi naóh yapabipna caá.

Diosboó ni hat Jesúíhwã míc wáacnit dih túinijeh ã chájat túutat pah, yeebdíhbut biíc yoobó ã náah yacna caá. ³⁴ Pánihna, míc wáacna, Dios ã wutatti pah ĩ weha mánadi h jepahna, ĩi weha mána yaádh lai hcanjeh ĩ joi chúudu naáh. ³⁵ Úúbh joííhna, íih muuná jwúub juibínitjeh, ĩ weha mánadi h ĩ úúbh joyó naáh. Yaádhboó pánih wéhena, bita wáac jwinít ĩ túi joi ñuunát dih ĩ yéecanachah,

ã túican caá. ³⁶ Yeéb míc wáacnit, ded pah ñi túi jummat pínahdih páant wã naáwát dih jóíhcan, nindih ñi túi jenah joyoó: Jesúih túini doonádih yeéboó naóh waóhnit nihcan caá. Yeebjéh caandíh jepahnit nihcan caá. Pánih waóhnit nihcan, nihát biíh tútchinadih moón Jesúihwã yeebdíh ï waáwáchah, ded pah ïpí chãjatdih náhninit, yeebbút biíc yoobó ñi chãjaá.

³⁷ Ded “Weém Túini Espíritu ã wēpatjīh Dios naáwát dih naóh yapani caá. ã wēpatjīh weemdíh ãpí jéihyana caá”, níj jenah joiníboó “Dios ã wutadit dih ded pah jwī míc wáacatdih Pablo yoobópdih ã naóh yapanap be”, ã níijí naáh. ³⁸ Obohjeéhtih, wã naáwát dih ã joyáh bojochah, bita caandíhbut ï joyáh bojo naáh.

³⁹ Pánihna, wã úudwã panihnitá, Dios naáwát dih naóh yapaat túut níijná, Túini Espíritu ã teo wáacat pínahdih búdí ñi úúbú. “Mácah wéheatjīh ñi naóhca bojoó”, níijcát caá náahap. ⁴⁰ Ñi jenah joyát pahjeh chãjcan, Dios ã wutadit pah túinijeh chãjat caá náahap.

15

Jesús ã boo pud jūúwát

¹ Būū wã úudwã panihnitá, Jesúih dooná yeebdíh ded pah wã naáwátjidih wã jwúub náhniabipna caá. Caán doonádih jwíih jepahnit, būubut jenah joinít ñi jumna caá. ² Caán doonádih ñi jepahachah, yeéb iiguípna bejnit dée-jidih Dios át túi ubup taga. Caán naáwát dih jói cádahcan, ãjeéh jummat túut níijná, Dios pebhboó ñi bejbipna caá. Obohjeéhtih, caandíh cádahna, ñi jwíih jepahatji dedé pínah nihcan níit.

³ Weemdíh jéihyani doonádih yeebdíh wã jwúub naáwáp jí. Oboh jumni naáwátjeh nihcan caá. Dios ã níijátji pah biíc yoobó Jesucristo jwī yéejat jíib át wun

wǎhup wut jī.* ⁴ Páant ã wunat túttimah, áih bácahdih ĩ yohochah, biíc peihcanni yeó jáap túttimah, Dios ã niijátji pah, át jwúub boo pud jũúwáp wut jī.* ⁵ Pánih boo pud jũóhni, Pedrodih át jíghop wut jī.* Túttimah, ã bohénitjidihbut át jíghop wut jī.* ⁶ Túttimah, áihwā quinientos chah ĩ míic wáac juyúchah, queétdihbut át jwúub jíghop wut jī. Biquína queét ennitjiboó ĩ wunuchah yuhna, nihat bitaboó páantjeh ĩ báadh jwuhna caá. ⁷ Túttimah, ã úud Santiagodih át jíghop wut jī. Pánih jíghonit, nihat ã naáwát túutnitdihbut át jíghop wut jī.

⁸ Pánih jíghoniji jeáboó ã púuh laab béjat túttimah, yeejép wā chāj jwuhuchah, wā jepahat pínah játih, weemdíhbut ã jíghop jī. Páant ã jíghochahjeh, ã boo pud jũúwát dih túi jenah joinít, caandíh wā jepahap jī.* ⁹ Jesúihwádih tabit yeejép wā chājachah yuhna, Jesús weemdíh jíghonit, áih doonádih ã naóh jibat túutup jī.* ¹⁰ Páant wā jamuchah yuhna, Dios weemdíh oinit, át jíghah enep taga. Pánih jíghah en túut nuumnít, Jesúih túini doonádih ã bohé jibat túutup jī. Pánihna, weemdíh ã teo wáacatjidih búdí wēinit, bita ã naáwát túutnit chah wā teona caá. Obohjeéhtih, wā wēpatjīhjih nihcan, Túini Espíritu ã teo wáacachah, Diosdih wā túi teo wāhna caá. ¹¹ Weém, queét bita ã naáwát túutnitbut, jwiít nihat páant Jesúih doonádih jwī bohénachah, yeéboó ñi jepahap jī.

Wunnit ĩ jwúub boo pud jũúwát

¹² Jesúih doonádih bohéna, ã jwúub boo pud jũúwát dihbut jwípí bohéna caá. Obohjeéhtih, páant jwī bohénachah

* 15:3 Is 53.5-12 * 15:4 Sal 16.8-10; Mt 12.40; Hch 2.24-32 * 15:5 Lc 24.34 * 15:5 Mt 28.16-17; Mr 16.14; Lc 24.36; Jn 20.19 * 15:8 Hch 9.3-6 * 15:9 Hch 8.3

joinít, nihat yeéb Jesúsdiñ jepahnit yuhna, ¿Dépanihna “Jwĩ boo pũd jũóhcan niít”, biquína ñi niij jenah joí? ¹³ Obohjeéhtih, boo pũd jũúwát ã wihcah nihna, Jesúsboó ãta boo pũd jũóhcan tagaá. ¹⁴ Jesús ã boo pũd jũóhcah nihna, áih doonádih jwĩ bohéat, caandíh ñi jepahatbut dedé pínah ãta nihcan tagaá. ¹⁵ Páant ã boo pũd jũóhcah nihna, Diofñ doonádih yee naóhñitjeh jwĩta jum taga. “Dios Jesucristodih át boonanap taga”, jwĩpí niij bohéna caá. Obohjeéhtih, boo pũd jũúwát ã wihcah nihna, Jesúsdiñ Dios ãta boocan tagaá. Caandíh ã boocah nihna, yee naóhñit jwĩta jum tagaá. ¹⁶ Boo pũd jũúwát ã wihcah nihna, Jesús ãta boo pũd jũóhcan tagaá. ¹⁷ ã boo pũd jũóhcah nihna, caandíh ñi jepahachah yuhna, dedé pínah ãta nihcan tagaá. Yéejat jíib páantjeh yeedíh ãta jum tagaá. ¹⁸ Páant ã boo pũd jũóhcah nihna, Jesúsíhwã wunnit, iiguípna míicjeh ita bej tagaá. ¹⁹ Pánihna, nin baácboó jum jwuhñit, Jesúsdiñ jwĩ jepahachah, ã teo wáacachah yuhna, jwĩ wunat túttimah páantjeh bũdná, jwiítboó chah moh yéejnit jwĩta jum taga.

²⁰ Obohjeéhtih, Jesucristo yoobópdiñ át boo pũd jũúwúp tají. Caán caá jwíih boo pũd jũóhni. Caán boo pũd jũóh waóhni ã jumuchah, jwiít áihwābut jwĩ boo pũd jũóhbipna caá. ²¹ Adán yéej chāj waóhna, át wun waáwáp tají. Obohjeéhtih, Jesucristoboó yéej chājcani jumna, wunniji át boo pũd jũóh waáwáp tají. ²² Adán yéej chāj waóhni, ã wunuchah, jwiít nihatbut yéej chājnit, jwĩpí wunna caá. Obohjeéhtih, Jesúsboó ã boo pũd jũóh waáwáchah, jwiít áihwābut jwĩ boo pũd jũóhbipna caá.* ²³ Nin pah ã jumna caá: Jesucristo át jwíih boo pũd jũúwúp tají. Túttimah, caán ã jwūub dei jũúwúchah, jwiít áihwābut jwĩ boo pũd jũóhbipna caá. ²⁴ Túttimah, nihat baácdiñ moón

* 15:22 Ro 5.12-18

maáta ĩ wēpatdih, nihat nemépwã ĩ wēpatdihbut yap yoh beedánit, nin pah Jesús Diosdih ã niĳ naóhbiþna caá: “Dáa buca, Paá, weemdĳh ma chájat tútatdih buu wã péana caá. Buu meemjéh caá wutni”, ã niĳbĳna caá. ²⁵ Páant ã niĳát pĳnah jãtih, Jesús páantjeh maáh ã jum jwuhat caá náahap, nihat Diosdih en jũihnitdih ã míic mao yap yohat pĳnah niĳná.* ²⁶ Páant ã yap yohochah, jwĳ jwúub wuncan niĳt. ²⁷ Dios naáwátidih naóh yapani David nin pah át niĳ daacáp tajĳ: “Dios nin pah ã niĳná caá: ‘Wã wũúh Jesucristo nihatdih yap yohnit, maáh ã jumuchah, nihat caandĳh ĩ jepahþina caá. Obohjeéhtih, weémboó chah maáh jumna, wã wũúhdih wã jepahcan niĳt’, Dios ã niĳná caá”, David át niĳ daacáp tajĳ.*

²⁸ Jesucristo nihatdih yap yoh péanit, ã ípdih “Dáa, buu nihat meemdĳh ĩ jepahna caá. Weembút meemdĳh jepahni caá”, Diosdih ã niĳbĳna caá. Pánihna, Dios chah maáh ã jumþina caá.

²⁹ Biquína yeéb Jesúsdiþ jepah jwuhcan, ĳi oinit Jesúhwã ĩ jummat peéh, ĩ mawachah ennit, nin pah ĳi niĳ jenah joyóp be: “Jesúhwã jumna, boo pud jũóhnit, Dios pebhboó ĩ beþþina caá”, niĳ jenah joinĳt, queédih jwúub enĳhna, túut nuumnĳt, ĳit daabáát túutur wut be. Obohjeéhtih, boo pud jũúwát ã wihcah, páant ĳita cháþcan tagaá. ³⁰ Jesúh doonádih jwĳ naáwát peéh, jwiĳtdihbut ĩ mawat dée tobohna caá. Pánihna, “Wã boo pud jũóhcan niĳt”, niĳ jenah joiná nihna, wãta naóh cádah tagaá. ³¹ Wã jéhna caá, yeó jáap jummat pah weemdĳh ĩ mao yohat dée tobohna caá. Obohjeéhtih, wã naáwáchah joinĳt, yeéb ĳi túut nuumátidih ennit, búdí wã wěina caá. Pánih wěinit, ã tobohochah yuhna, wã naóh cádahcan niĳt. ³² Nin Éfeso tútchidih dawá jiowá pah íĳnit, Jesúh

* 15:25 Sal 110.1 * 15:27 Sal 8.6

doonádih wã naáwát jíib, weemdíh ĩ mawíhip yuh jí. Pánihna, boo pud jũúwát ã wihcah, dedé pínah áta nihcan tagaá. Jwĩ boo pud jũóhcan, “Waícanjeh jwĩ wunat pínah játih, jwiít dih wēi babh jeémátjeh caá náahap”,* ĩpí niiját pah yoobóp dih áta jum taga. Obohjeéhtih jwĩ boo pud jũóh bípna caá.

³³ Yee naóh nit dih ñi joyáh bojoó. “Yeejépwádih pej jum nit, bíc yoobó yeejép ñi jumbípna caá”, bita ĩ niiját dih ñi tái náhninaá. ³⁴ Yeebdíh jwúub tái jenah joinít, yeej cháj cádahat caá náahap. Biquína ñijeéh jum nit Dios dih tái jéihcan, jwiít dih ã boo pud jũúwát tútat pínah dih but jenah joicán, ĩ yeej chájna caá. Páant ĩ chájat dih yeebdíh tícat caá náahap.

Ded pah túttimah jwíih bácah ã jum at

³⁵ Biquína yeéb “Jwĩ jwúub boo pud jũóh bípna caá”, jwĩ niiját dih páantjeh beh joicán, nin pah ñi níj úubh joimí nacaá. ¿Ded pah wunnit ĩ jwúub boo pud jũóh bi? ¿Ded pah íih bácah ã jumbi? ñi níj úubh joimí nacaá. ³⁶ Pánih úubh joiná, ñi tái jenah joicán caá. Momnidih ñi jenah joyoó. Jwĩ momochah, áih jih bóo chóa ã wunuchahjeh, díttmant bóo ápí chíih jũóhna caá. ã wuncah, áta chíih jũóhcan taga. ³⁷ Chíih jũóh niboó jwĩ momnidih bíc yoobó nihcan caá. Pánihat dée jwĩ jwúub boo pud jũúwúchah, jwíih bácah but mácah ã jumbípna caá. ³⁸ Nihat jwĩ momni chíih jũóh nit ded pah ã jum at pínah dih Diosboó át chájp taga. Bíhnajih jwĩ wid momochah, bíc pah jíghni míc ã chíih jũóhcan níit.

³⁹ Páant ã jum at dée nihat bácah nabut bíc yoobó nihcan caá. Cáacwã, nuñúpwã, jwébehwã, queejwá nihat íih bácah mácah ã jum na caá. ⁴⁰ Nihat jeáboó jum ni,

*

15:32 Is 22.13

baácboó jum̄nibut biíc yoobó nihcan caá. Jeáboó jum̄ni ã túyat mácah, baácboó jum̄ni ã túyatbut mácah ã jum̄na caá. ⁴¹ Nihat jeáboó jum̄nibut biíc yoobó ã yeh iigcán caá. Yeóboó mácah, widhboó mácah, cúiwābut mácah ã yeh iigná caá. Cúiwā míicjehbut mácah ã yeh iigná caá.

⁴² Pánihna, momni mácah ã chíih jūwát pah, jwī wunuchah, ī yoh̄ni bácah jwūub boo pud jūóhna, mácah ã jum̄bipna caá. Jwī wunuchah, jwīih bácah ã moórbipna caá. Obohjeéhtih, jwī boo pud jūwát túttimah, jwīih jáap bácah ã jwūub moórcan níit. ⁴³ Jwī wunuchah, jwīih bácah ã túi jíghcan caá. Obohjeéhtih, jwī boo pud jūwúchah, túini ã jum̄bipna caá. Jwī wunuchah, jwīih bácah wēpcanni caá. Obohjeéhtih, jwī boo pud jūwúchah, túi wēpni ã jum̄bipna caá. ⁴⁴ Nin baácboó jwī jum̄ jwuh̄ni bácah ã wunbipna caá. Obohjeéhtih, Dios pehbboó jum̄ni pínah bácah ã jwūub boo pud jūóh̄bipna caá. Nin baácboó jwī jum̄at pínah bácahdih Dios át wūhup wut jī. Pánih wūhna, biih bácah ājeéh jum̄at pínahdihbut ã wūhbipna caá.

⁴⁵ Dios naáwátdih daácn̄i nin pah át níj daacáp tajī: “Ā jwīih chāj̄ni newédih Dios áih bácahdih caolih jéyanachah, át caolih wáyap wut jī. Caán newé Adán át wūt jum̄up wut jī”, át níj daacáp tajī.* Obohjeéhtih Jesucristo, Péeni Adán wūt jum̄nidih boan̄it, áih b́acahdih Dios mácah át chājap wut jī. Pánih caandíh boan̄it, jwiítdihbut ã boobipna caá, ã pehbboó ājeéh jwī jum̄at pínah niijná. ⁴⁶ Nin baácboó jwī jum̄at pínah bácahdih Dios át jwīih chājap tajī. Túttimah, jeáboó ājeéh jwī jum̄at pínah jáap bácahdihbut ã chāj wūhbipna caá. ⁴⁷ Dios Adándih baácjīh át chājap wut jī. Obohjeéhtih, Jesucristo-bodíh jeámant át wah deyanap wut jī. ⁴⁸ Jwiít nihat

* 15:45 Gn 2.7

Adán jumena jumna, áih bácah déedih jwí bíbohna caá. Jesucristoíhwā jumna, áih jáap bácah déedih jwiítbut jwí bíbohhipna caá. ⁴⁹ Bũũ nin baácboó jum jwũhna, baácjĩh chãjni Adán pah jĩgohnit jwí jumna caá. Túttimah, jeáboó jumna, Jesús pah jĩgohnit jwí jumbipna caá. ⁵⁰ Wã úudwã panihnitá, páant wã naáwátdih jenah joinít, nindih ñi túi náhninaá: Nin baácboó jwí jum jwũhni bácah, yéejni jumna, Dios pebhboó yéejat wihcapna ã jéih jumcan niít. Moópni pínah jumna, Dios pebhboó moopát wihcapnabut ã jéih jumcan niít.

⁵¹ Játih Dios ã jéihya jwũhca naáhdih bũũ yeebdĩh wã naóhna caá. Nin wã naáwátdih ñi túi jenah joyoó: Jesucristo ã jwũub dei jũúwát pínah játih, nihat jwiít áihwã jwí wũncan niít. Obohjeéhtih, jwí wũnat túttimah, jwí wũn jwũhcah, bíc yoobó jwiít nihatdih ã túut nũumbípna caá. ⁵² Bíc láa quíb pínah bojat pah jwí túut nũumát ã jumbipna caá. Péeni póojat nah ã yáanachah, jwiít nihat áihwãdih Dios ã túut nũumbípna caá. ã yáanachahjeh, nihat áihwã wũnnitji jáap bácah jumnit ĩ jwũub boo pud jũóhhipna caá. Áihwã báadhnitdihbut ã túut nũumbípna caá.* ⁵³ Bũũ jumni bácah wũnna, ã moórbipna caá. Obohjeéhtih, jwiítidih ã túut nũumát túttimah, jwíĩh jáap bácah jwũub wũncan, ã moópcan niít. ⁵⁴ Páant ã yapachah, Dios naáwátdih naóh yapani Isafas nin pah ã niój daacátji bíc yoobó ã yapbipna caá: “Dios nihatdih át yap yohop tagaá. Páant ã yap yohochah, áihwã ĩ jwũub wũncan niít”, át niój daacáp tajĩ.* ⁵⁵ Dios naáwátdih naóh yapani Oseas nin pah ã niój daacátjidihbut bíc yoobó ã yapbipna caá: “jWũnat ã jwũub wihcan niít! Páníhna, bũũ jwí yéejat peéh wũnatdih jwí úumcan caá”,* ã niój daacátji

* 15:52 1Ts 4.15-17

* 15:54 Is 25.8

* 15:55 Os 13.14

pah jwiít áihwā wēinit, jwī niijbípna caá. ⁵⁶ Moisésji ã wutatdih jéihna yuhna, jwiít nihat jwīpí tui jepahcan caá. Pánih jepahcan, “Weém yéejni caá”, jwī niij jéihna caá. Páant jwī jumatdih jéihnit, jwī wunat táttimah, dedé yéejat peéh chājatdih úumna, wunatdihbat jwīpí úumna caá. ⁵⁷ Obohjeéhtih, Jesucristo wun wāhnit, ã jwáub boo pud jūúwúchah, jwiít áihwā iiguípna bejnit déeji jwáub boo pud jūóhnit, Diosjeéh jumat túut niijná, ã pehbóo jwī bejbipna caá. Páant jwī jumat pínahdih jéihna, Diosdih búdí wēinit, “Túina caá”, jwīpí niijná caá.

⁵⁸ Wā úudwā panihnitá, yeebdíh búdí oinit, nin pah wā naóhna caá: Jesúsdihi ñi jepah cádahca bojoó. Bitaboó yeebdíh yeenit, mácah i bohénachah yuhna, joyáh bojnit, yoobópdih Jesúh doonádih ñi tui jenah joyoó. Pánih jenah joinit, “Diosdih jwī teo wūhat buudní pínah niican caá”, niij jéihnit, ded pah ã chājat túutatdih tui wēinit, ñi chājaá.

16

Ded pah dinerodih wūhat

¹ Búú biih naáwátidih yeebdíh wā naóhbipna caá. Jerusalén tátchidih moón Jesúhwādihi teo wáacat pínah dinerodih ded pah ñi chājat pínahdih wā naóhbipna caá. Galacia baácidih moón Jesúhwā míic wáacnitdih nin pah wā chājat túutat pah biic yoobó ñi chājaá.* ² Chooát yeó jáap jumat pah débóo dinero ñi wūhat pínahdih yeéb nihat ñi jwejepboó ñi ámohoó. Det i tewat jib búdí bíbohniit, búdí i ámoho naáh. Det baini bíbohniit, baini i ámoho naáh. Pánih ámohna, ñi pebhna wā juibínachah, queét moh yéejnitdih ñi wahni pínah dinerodih ñi bíbohniit caá. ³ Wā juibíát pínah játih, dinerodih ub bejnit

* 16:1 Ro 15.25-26; 2Co 8-9

pínah neonádihbut ñi ñíwií. Páant ñi ñíwichah, jwíbínit, Jerusaléndih moón Jesúíhwā queétdih ī túi jéihyat pínah niijná, wā daác wūhbiḡna caá. ⁴ Weemdíhbut Dios ā wahachah, queét biícđih wā bejbipna caá. Obohjeéhtih, wā jéih jwūhcan caá.

Pablo ā jib bejat pínah

⁵ Nin pah wā jib bejat pínahdih wā niíj jenah joiná caá: “Ninmant bejnit, Macedonia baácđih jumni tútchinadih jib bej péanit, Corinto tútchidih moón Jesúíhwā pebhna wā jwíbibiḡna caá”, wā niíj jenah joiná caá.* ⁶ “Maatápdih íjeéh chāo jwūhñit, mah noój ā yapat túttimah, biíh tútchina wā bejbipna caá. Pánih chāoníji wā yap bejat túut chājachah, weemdíh ī jéih teo wáacbiḡna caá”, wā niíj jenah joiná caá. ⁷ Pánihna, ñijeéh maatápdih jumíhna, Macedonia baácđih wā jib bejat túttimah ñi pebhboó wā jwíbibiḡna caá. Butéh bejna, maátcanjeh wāta jéih jum tagaá. Dios ā náahachah, túi maatápdih ñijeéh wā chāo jwūhbiḡna caá. ⁸ Obohjeéhtih, butéh nin Éfeso tútchiboó Pentecostés yeó jáapnadih páantjeh wā jum jwūhbiḡna caá.* ⁹ Ninboó dawá wā bohéatđih íjñit, ī bohéat túutcah yūhna, Dios ā teo wáacatjīh búdí wā bohénachah, dawá joiná caá ī chājap. Pánihna, weemdíh íjeéh jummat caá náahap. Pánih jumniḡi Pentecostés túttimah, ñi pebhna wā bejbipna caá.*

¹⁰ Timoteo ñi pebhna ā jwíbínachah, ā náhni dahwacat pínah niijná, ñi túi teo wáacá. Jwī Maáhdih teo wūhni wā jummat pah, caanbút Jesúsđih teo wūhni caá. Páant ā jumūchah, caandíh ñi túi en dawaá.* ¹¹ Caandíh yap yohcanjeh, yeéb nihadđih túi joyát caá náahap. Caandíh túi wēinit, wā jumupna ā jwūub jūúwát pínah niijná, ñi

* 16:5 Hch 19.21

* 16:8 Lv 23.15-21; Dt 16.9-11

* 16:9 Hch 19.8-10

* 16:10 1Co 4.17

túi teo wáacá. Caán, biíh Jesúíhwā biícđih ĩ jwáub juyát pínahđih wā bidna caá.

¹² Apolosđih “Bita Jesúíhwā biícđih Corinto tútchidih moón Jesúíhwāđih meembút enedih ma bejeé”, wā wēp niijíp yuh be. Obohjeéhtih, buu ã jéih bej jwuhcan caá. Túttimah, débólih ã bejihna, ã bejmi dée caá.

Pablo ã pée túyat túutat

¹³ Bita ĩ yéjeaat déedih yap yohat túut niijná, túi jenah joinít jumat caá náahap. Nemépwābut ĩ yéjeaat déedih úumcanjeh, yap yohat túut niijná, Jesúsđih ñi túi jenah joí cádahca bojoó. ¹⁴ Pánihna, oinit, bitadih túi chājat caá náahap.

¹⁵ Wā úudwā panihnitá, nihat Acaya baácđih moón Jesúsđih ĩ jepahat pínah játih, Estéfanawā ĩ jepahatjidih ñi jéihna caá. Queét Jesúíhwāđih búdí ĩpí teo wáacna caá.* ¹⁶ Pánih teo wáacnit jumna, ĩ naáwáchah, ñi túi jepahaá. Bita queét panihnit maáta, bita Jesúsđih teo wāhñitđihbut túi jepahat caá náahap.

¹⁷ Yeéb Corintodih moondih búdí bidna wā chājap be. Pánihna, ñi wahnit Estéfanas, Fortunato, Acaicojih ninna ĩ juyúchah, búdí wā weñep be. ¹⁸ Yeéb biícđih jumna, yebđih ĩt weñanap tagaá. Biíc yoobó ninna jwinít, weemđihbut ĩ weñanap be. Pánih teo wáacnitđih “Ñi túi chājap be”, yebđih niiját caá náahap.

¹⁹ Asia baácđih moón Jesúíhwā míc wáacnit yebđih ĩ túyat túutna caá. Aquila, Priscilajih ĩih muáboó míc wáacnit Jesúíhwābut búdí ĩ túyat túutna caá. “Jwī Maáh Jesúsjeéh ĩ túi jumna naáh”, niijnít, ĩ túyat túutna caá.*

²⁰ Nihat nin Éfeso tútchidih moón Jesúíhwābut yebđih ĩ túyat túutna caá. Yeebút Jesús ã oyatjih ñi túi míc úúbú.

* 16:15 1Co 1.16 * 16:19 Hch 18.2

²¹ Bũũ nin péenibitdih weemjéh wã daácna caá. Weembát yeebdíh búdí wã túyat túutna caá.

²² Ded jwĩ Maáhdih túi oicannidih Dios ã peéh chãja naáh. Jwĩ Maáh Jesús waícanjeh ã jwũub dei jũúwú naáh.

²³ Jwĩ Maáh Jesús yeebdíh búdí oinit, ã teo wáaca naáh.

²⁴ Jesucristo ã oyatjĩh biíc dih moon páh yeéb nihatdih búdí wã oina caá.

Páant bóojeh tigaá wã naáwát.

Pablo

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06
